



Bosnia and Herzegovina
Federation of Bosnia and Herzegovina

CANTON SARAJEVO
Prime Minister's Office

Broj: 02/01-45-75- 73/26
Sarajevo, 01.06.2026. godine

PREDSJEDAVALAČI SKUPŠTINE KANTONA SARAJEVO
- o v d j e -

PREDMET: Odgovor na zastupničku inicijativu - *dostavlja se;*

Poštovani,

dana 26.02.2026. godine Vlada Kantona Sarajevo donijela je Rješenje o imenovanju Radnog tijela za izradu nacrtu Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice, pomoći žrtvama i porodicama žrtava genocida nad Bošnjacima zaštićene zone UN-a "Srebrenica" (u daljem tekstu: Zakon), u skladu sa Vašom zastupničkom inicijativom za izmjene i dopune Zakona u smislu proširenja teritorijalnog obuhvata Zakona na cijelu regiju istočne Bosne i izmjene sjedišta Ureda Vlade Kantona Sarajevo za podršku Srebrenici. Zaključkom Vlade Kantona Sarajevo od 14.05.2026. godine Kabinet premijera Kantona Sarajevo zadužen je da pripremi odgovor na Vašu zastupničku inicijativu.

Postupajući po navedenom, obavještavam Vas da je pomenuto Radno tijelo Kabinetu premijera dostavilo svu dokumentaciju proizašlu u toku obavljanja zadatka predviđenim Rješenjem o imenovanju, i to Poslovnik o radu Radnog tijela, zapisnike sa sjednica (ukupno četiri održane sjednice), Izvještaj o radu Radnog tijela, te Nacrt Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice i drugih opština regije Istočna Bosna, pomoći žrtvama i porodicama žrtava genocida nad Bošnjacima zaštićene zone UN-a "Srebrenica". U Izvještaju o radu od 27.03.2026. godine je, između ostalog, navedeno da je, zbog potrebe mijenjanja naziva propisa u skladu sa zastupničkom inicijativom, te činjenice da obim izmjenjena trenutno važećeg Zakona premašuje 50% članova zakona, potrebno pristupiti izradi potpuno novog zakona, u kojem smislu je i dostavljen Nacrt novog zakona.

Cijeneći navedeno, u prilogu dostavljam:

- Zaključak Vlade Kantona Sarajevo broj 02-04-26616-34/26 od 14.05.2026. godine,
- Rješenje o imenovanju Radnog tijela za izradu nacrtu Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice, pomoći žrtvama i porodicama žrtava genocida nad Bošnjacima zaštićene zone UN-a "Srebrenica broj 02-04-6172-34/26 od 26.02.2026. godine,
- Poslovnik o radu Radnog tijela,



- Zapisnike sa sjednica,
- Izvještaj o radu Radnog tijela,
- Nacrt Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice i drugih opština regije Istočna Bosna, pomoći žrtvama i porodicama žrtava genocida nad Bošnjacima zaštićene zone UN-a "Srebrenica".

PO OVIJAŠTENJU ŠEFICE KABINETA

Nedima Ramović-Šiljević



DOSTAVITI:

1. Naslovu,
2. a/a.



02/11
1201

Bosnia and Herzegovina
Federation of Bosnia and Herzegovina
CANTON SARAJEVO
Government

Broj: 02-04-26616-34/26
Sarajevo, 14.05.2026. godine

Na osnovu člana 26. i 28. stav (4) Zakona o Vladi Kantona Sarajevo („Službene novine Kantona Sarajevo“, broj: 36/14 - Novi prečišćeni tekst i 37/14 - Ispravka), a u vezi sa Rješenjem Vlade Kantona Sarajevo, broj: 02-04-6172-34/26 od 26.02.2026. godine Vlada Kantona Sarajevo, na **166.** vanrednoj sjednici održanoj **14.05.2026.** godine, donijela je

ZAKLJUČAK

1. Prihvata se Izvještaj o radu Radnog tijela za izradu Nacrta Zakona o izmjenama i dopunama Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice, pomoći žrtvama i porodicama žrtava genocida nad Bošnjacima zaštićene zone UN-a „Srebrenica“, imenovanog Rješenjem Vlade Kantona Sarajevo broj: 02-04-6172-34/26 od 26.02.2026. godine.
2. Zadužuje se Kabinet premijera Kantona Sarajevo da pripremi odgovor na zastupničku inicijativu zastupnika u Skupštini Kantona Sarajevo Elvedina Okerića u vezi sa izmjenama i dopunama Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice, pomoći žrtvama i porodicama žrtava genocida nad Bošnjacima zaštićene zone UN-a „Srebrenica“.
3. Zadužuju se ministarstva i službe u kojim su zaposleni članovi Radnog tijela da istima isplate naknadu za rad u Radnom tijelu, u skladu sa tačkom IV Rješenja Vlade Kantona Sarajevo broj: 02-04-6172-34/26 od 26.02.2026. godine.
4. Ovaj zaključak stupa na snagu danom donošenja.

Dostaviti:

1. Predsjedavajući Skupštine Kantona Sarajevo,
2. Zamjenici predsjedavajućeg Skupštine Kantona Sarajevo (3x),
3. Premijer Kantona Sarajevo,
- ④ Kabinet premijera Kantona Sarajevo,
5. Kabinet predsjedavajućeg i zamjenika predsjedavajućeg Skupštine Kantona Sarajevo,
6. Ministarstvo pravde i uprave Kantona Sarajevo,
7. Ured Vlade Kantona Sarajevo za podršku Srebrenici,
8. Evidencija,
9. Arhiva.





Broj: 02-04-6172-34/26
Sarajevo, 26.02.2026. godine

Na osnovu člana 26. i 28. stav (3) Zakona o Vladi Kantona Sarajevo („Službene novine Kantona Sarajevo“, broj: 36/14 - Novi prečišćeni tekst i 37/14 - Ispravka), a u skladu sa članom 5., 6. i 10. Uredbe o načinu obrazovanja radnih tijela koje obrazuje Vlada Kantona Sarajevo i radnih tijela koje obrazuju rukovodioci kantonalnih ministarstava, samostalnih kantonalnih uprava, samostalnih kantonalnih upravnih organizacija, uprava i upravnih organizacija koje se nalaze u sastavu ministarstava i stručnih službi koje osniva Vlada Kantona Sarajevo („Službene novine Kantona Sarajevo“, broj: 48/25) Vlada Kantona Sarajevo, na 117. sjednici održanoj 26.02.2026. godine, donijela je

RJEŠENJE

O IMENOVANJU RADNOG TIJELA ZA IZRADU NACRTA ZAKONA O IZMJENAMA I DOPUNAMA ZAKONA O POSEBNIM PROGRAMIMA KANTONA SARAJEVO ZA MEMORIJALIZACIJU GENOCIDA, PODRŠKU POVRATKU I RAZVOJU SREBRENICE, POMOĆI ŽRTVAMA I PORODICAMA ŽRTAVA GENOCIDA NAD BOŠNJACIMA ZAŠTIĆENE ZONE UN-A „SREBRENICA“

I

Imenuje se Radno tijelo za izradu nacrtu Zakona o izmjenama i dopunama Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice, pomoći žrtvama i porodicama žrtava genocida nad Bošnjacima zaštićene zone UN-a „Srebrenica“ (u daljnjem tekstu: Radno tijelo), u sljedećem sastavu:

1. Dino Mešić, šef Odjeljenja za procjenu uticaja i izradu propisa u Sektoru za propise, Ministarstvo pravde i uprave Kantona Sarajevo,
2. Selimanović Mediha, stručni savjetnik za pravne i opće poslove u Kabinetu predsjedavajućeg i zamjenika predsjedavajućeg Skupštine Kantona Sarajevo i
3. Ramović Nedima, stručni savjetnik za pravne i opće poslove u Kabinetu premijera Kantona Sarajevo.

Na prvom sastanku Radnog tijela usvojiti će se Poslovnik o radu, te će članovi usaglašeno dogovoriti ko će obavljati funkciju predsjedavajućeg Radnog tijela.

Administrativno-tehničke poslove obavljat će svi članovi Radnog tijela u skladu sa usaglašenom raspodjelom poslova.

II

Zadatak Radnog tijela je izrada nacrtu Zakona o izmjenama i dopunama Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice, pomoći žrtvama i porodicama žrtava genocida nad Bošnjacima zaštićene zone UN-a „Srebrenica“ („Službene novine Kantona Sarajevo“, broj: 18/22), u skladu sa zastupničkom inicijativom predsjedavajućeg Skupštine Kantona Sarajevo. Radno tijelo može predložiti i druge izmjene i dopune

koje eventualno smatra korisnim za svrsishodniju i efikasniju primjenu predmetnog zakonskog propisa.

Nacrt izmjena i dopuna Zakona, odnosno izvještaj Radnog tijela, na sjednici Vlade će prezentovati predsjedavajući Radnog tijela ili drugi član ako Radno tijelo tako usaglasi, a Kabinet premijera Kantona Sarajevo će pomoći prilikom koordinacije izrade i predaje materijala za razmatranje na sjednici Vlade Kantona Sarajevo.

Prilikom obavljanja zadatka Radno tijelo će saradivati sa šefom Ureda Vlade Kantona Sarajevo za podršku Srebrenici.

III

Rok za ispunjavanje radnog zadatka je trideset (30) dana.

Radno tijelo će poslove obavljati izvan redovnog radnog vremena.

IV

U skladu sa članom 10., 11. i 12. Uredbe o načinu obrazovanja radnih tijela koje obrazuje Vlada Kantona Sarajevo i radnih tijela koje obrazuju rukovodioci kantonalnih ministarstava, samostalnih kantonalnih uprava, samostalnih kantonalnih upravnih organizacija, uprava i upravnih organizacija koje se nalaze u sastavu ministarstava i stručnih službi koje osniva Vlada Kantona Sarajevo („Službene novine Kantona Sarajevo“, broj: 48/25), članovi Radnog tijela imaju pravo na naknadu za rad u neto iznosu od 400,00 KM.

Novčana naknada se isplaćuje sa razdjela ministarstva odnosno stručne službe u kojoj je zaposlen član Radnog tijela.

IV

Ovo rješenje stupa na snagu danom donošenja.



Dostaviti:

1. Predsjedavajući Skupštine Kantona Sarajevo,
2. Zamjenici predsjedavajućeg Skupštine Kantona Sarajevo (3x),
3. Premijer Kantona Sarajevo,
4. Kabinet premijera Kantona Sarajevo,
5. Imenovani (3x) (putem Kabineta premijera Kantona Sarajevo),
6. Ministarstvo pravde i uprave Kantona Sarajevo,
7. Ured Vlade Kantona Sarajevo za podršku Srebrenici,
8. Evidencija,
9. A r h i v a.



Adresa: Reisa Džemaludina Čauševića 1, 71 000 Sarajevo
Tel: + 387 (0) 33 562-000, Fax: + 387 (0) 33 562-076
Web: <http://vlada.ks.gov.ba>, E-mail: vlada@vlada.ks.gov.ba

BOSNA I HERCEGOVINA

FEDERACIJA BOSNE I HERCEGOVINE

KANTON SARAJEVO

Radno tijelo za izradu Nacrta Zakona o izmjenama i dopunama Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice, pomoći žrtvama i porodicama žrtava genocida nad Bošnjacima zaštićene zone UN-a "Srebrenica"

Datum: 11.03.2026. godine

POSLOVNIK

o radu Radnog tijela za izradu Nacrta Zakona o izmjenama i dopunama Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice, pomoći žrtvama i porodicama žrtava genocida nad Bošnjacima zaštićene zone UN-a "Srebrenica"

Sarajevo, mart 2026. godine



Radno tijelo za izradu Nacrta Zakona o izmjenama i dopunama Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice, pomoći žrtvama i porodicama žrtava genocida nad Bošnjacima zaštićene zone UN-a "Srebrenica", imenovano Rješenjem Vlade Kantona Sarajevo, broj: 02-04-6172-34/26 od 26.02.2026. godine, d o n o s i:

POSLOVNIK

o radu Radnog tijela za izradu Nacrta Zakona o izmjenama i dopunama Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice, pomoći žrtvama i porodicama žrtava genocida nad Bošnjacima zaštićene zone UN-a "Srebrenica"

DIO PRVI - OPĆE ODREDBE

Član 1.

(Predmet)

Ovim poslovnikom uređuje se način rada Radnog tijela za izradu Nacrta Zakona o izmjenama i dopunama Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice, pomoći žrtvama i porodicama žrtava genocida nad Bošnjacima zaštićene zone UN-a "Srebrenica" (u daljem tekstu: Radno tijelo) koje je dužno postupati u skladu sa uputama datim u Rješenju Vlade Kantona Sarajevo, broj: 02-04-6172-34/26 od 26.02.2026. godine (u daljem tekstu: Rješenje o imenovanju).

Član 2.

(Članovi Radnog tijela)

Radno tijelo čine dva člana i predsjedavajući.

DIO DRUGI -POSLOVI RADNOG TIJELA

Član 3.

(Poslovi Radnog tijela)

(1) Poslovi Radnog tijela uključuju: analizu važećeg Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice, pomoći žrtvama i porodicama žrtava genocida nad Bošnjacima zaštićene zone UN-a "Srebrenica", izradu Nacrta Zakona o izmjenama i dopunama Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice, pomoći žrtvama i porodicama žrtava genocida nad Bošnjacima zaštićene zone

UN-a "Srebrenica" (u daljem tekstu: Nacrt Zakona), u skladu sa zastupničkom inicijativom predsjedavajućeg Skupštine Kantona Sarajevo, predlaganje i drugih izmjena i dopuna koje se smatraju korisnim za svrsishodniju i efikasniju primjenu predmetnog zakona, učešće na sjednicama Radnog tijela, pripremanje radnog materijala u skladu sa zaključcima sa sjednica Radnog tijela, aktivno učešće u diskusiji o pitanjima bitnim za izradu Nacrta Zakona, davanje relevantnih mišljenja i sugestija i svi drugi poslovi vezani za izvršenje zadatka Radnog tijela.

(2) Prilikom obavljanja zadataka Radno tijelo će saradivati sa šefom Ureda Vlade Kantona Sarajevo za podršku Srebrenici.

DIO TREĆI-RAD RADNOG TIJELA

Član 4.

(Rad i odlučivanje Radnog tijela)

- (1) Radno tijelo radi i odlučuje na sjednicama.
- (2) Radno tijelo može raspravljati i odlučivati ako sjednici prisustvuje većina od ukupnog broja članova.
- (3) Zaključke i odluke Radno tijelo donosi većinom glasova prisutnih članova.
- (4) Članovi Radnog tijela koji nisu glasali za usvojenu odluku imaju pravo na izdvojeno mišljenje.
- (5) Radno tijelo dostavlja izvještaj o radu i Nacrt Zakona Vladi Kantona Sarajevo, a Kabinet premijera Kantona Sarajevo će pomoći prilikom koordinacije izrade i predaje materijala za razmatranje na sjednici Vlade Kantona Sarajevo, u skladu sa tačkom II Rješenja o imenovanju.

DIO ČETVRTI - PRIPREMANJE I SAZIVANJE SJEDNICA

Član 5.

(Način sazivanja sjednica)

- (1) Radno tijelo održava sjednice s ciljem realizacije aktivnosti.
- (2) Sjednice Radnog tijela se organiziraju u prostorijama Zgrade Vlade Kantona Sarajevo, ul. Reisa Džemaludina Čauševića br. 1.
- (3) Sjednicu saziva i njom predsjedava predsjedavajući Radnog tijela.
- (4) U slučaju spriječenosti predsjedavajućeg da prisustvuje sjednici, sjednicu saziva i njom predsjedava član Radnog tijela kojeg ovlasti predsjedavajući Radnog tijela.
- (5) Svaki član Radnog tijela može inicirati održavanje sjednice, a inicijativu podnosi elektronskim putem predsjedavajućem Radnog tijela.
- (6) Sazivanje sjednice Radnog tijela vrši se elektronskim putem, putem službenih email adresa.
- (7) Sjednice Radnog tijela mogu se održavati i elektronskim putem, uz osiguranje uslova za aktivno sudjelovanje svih članova.

Član 6.

(Prijedlog dnevnog reda i tok sjednice)

- (1) Prijedlog dnevnog reda sastavlja i predlaže predsjedavajući Radnog tijela u saradnji sa članovima Radnog tijela.
- (2) Dnevni red se utvrđuje na osnovu ranije dostavljenog pisanog materijala i na osnovu dostavljenih prijedloga dnevnog reda.
- (3) Predsjedavajući započinje sjednicu i utvrđuje prisutnost članova Radnog tijela.

Član 7.

(Zapisnik sa sjednice Radnog tijela)

- (1) O toku i radu sjednice Radnog tijela vodi se zapisnik koji sadrži:
 - a) datum i mjesto održavanja sjednice,
 - b) utvrđivanje prisutnih odnosno odsutnih članova Radnog tijela,
 - c) dnevni red sjednice,
 - d) sažetak rasprave,
 - e) prijedloge, mišljenja i sugestije članova Radnog tijela i
 - f) donesene zaključke.
- (2) Svaki član Radne grupe na sjednici može tražiti da se njegova izjava, mišljenje ili prijedlog unesu u zapisnik.
- (3) Zapisnik potpisuju predsjedavajući i članovi Radnog tijela prisutni na sjednici.

Član 8.

(Izvještaj Radnog tijela)

- (1) Radno tijelo nakon okončanih aktivnosti podnosi Vladi Kantona Sarajevo izvještaj o radu, u čijem su prilogu svi zapisnici i materijali proistekli u radu Radnog tijela.
- (2) Završni izvještaj potpisuje predsjedavajući i svi članovi Radnog tijela.

Član 9.

(Prestanak rada Radnog tijela)

Radno tijelo prestaje sa radom podnošenjem Izvještaja iz člana 8. ovog poslovnika, a najkasnije 30 dana od dana donošenja Rješenja o imenovanju.

DIO PETI-ZAVRŠNE ODREDBE

Član 10.

(Stupanje na snagu)

Ovaj poslovnik stupa na snagu danom donošenja.

PREDSJEDAVAJUĆI RADNOG TIJELA

ČLAN

ČLAN

P

**Bosna i Hercegovina
Federacija Bosne i Hercegovine
KANTON SARAJEVO**

Radno tijelo za izradu Nacrta Zakona o izmjenama i dopunama Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice, pomoći žrtvama i porodicama žrtava genocida nad Bošnjacima zaštićene zone UN-a "Srebrenica"

**ZAPISNIK
sa prve sjednice Radnog tijela**

Mjesto održavanja: Zgrada Kantona Sarajevo (sala 100), Ul. Reisa Džemaludina Čauševića br. 1

Datum održavanja: 11.03.2026. godine, sa početkom u 16:00 sati

Sjednici Radnog tijela, imenovanog Rješenjem Vlade Kantona, broj: 02-04-6172-34/26 od 26.02.2026. godine, prisustvovali su sljedeći članovi:

1. Dino Mešić, Ministarstvo pravde i uprave Kantona Sarajevo, član
2. Mediha Selimanović, Kabinet predsjedavajućeg i zamjenika predsjedavajućeg Skupštine Kantona Sarajevo, član
3. Nedima Ramović, Kabinet premijera Kantona Sarajevo, član

Konstatovano je postojanje kvoruma za odlučivanje, te je predložen i usvojen sljedeći:

DNEVNI RED

1. Izbor predsjedavajućeg Radnog tijela,
2. Usvajanje Poslovnika o radu Radnog tijela,
3. Analiza Inicijative predsjedavajućeg Skupštine Kantona Sarajevo za izmjenu Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice, pomoći žrtvama i porodicama žrtava genocida nad Bošnjacima zaštićene zone UN-a "Srebrenica" (u daljem tekstu: Zakon) i rad na usklađivanju teksta Zakona sa prijedlozima iz inicijative.
4. Razno.

Dnevni red je jednoglasno usvojen.

Ad. 1

Konstatovano je postojanje kvoruma za odlučivanje, nakon čega se pristupilo izboru predsjedavajućeg Radnog tijela. Za ovu funkciju izabran je Dino Mešić. Nakon izbora, predsjedavajući je preuzeo vođenje sjednice.

Ad. 2

Članica Radnog tijela Mediha Selimanović prezentovala je nacrt Poslovnika o radu Radnog tijela. Poslovnik kojim se regulišu način rada, prava i obaveze članova radnog tijela je nakon razmatranja jednoglasno usvojen.

Ad. 3

U skladu sa Rješenjem o imenovanju, Radno tijelo je pristupilo radnim zadacima. Detaljno je analizirana podnesena inicijativa za izmjenu Zakona. Radno tijelo je konstatovalo da obim predloženih izmjena premašuje 50% članova važećeg zakona, te da usvajanje inicijative zahtijeva i izmjenu samog naziva propisa. Shodno navedenom, utvrđeno je da je, u skladu sa Pravilima i postupcima za izradu zakona i drugih propisa Federacije Bosne i Hercegovine, potrebno pristupiti izradi potpuno novog teksta Zakona.

U nastavku sjednice, Radno tijelo je izvršilo analizu teksta važećeg zakona i pristupilo izmjenama pojedinačnih članova kako bi se uskladili sa zahtjevima iz inicijative.

S tim u vezi, Radno tijelo je na prvoj sjednici analiziralo čl. 1. do 9. Zakona, te je utvrdilo sljedeće izmjene, odnosno dopune :

Naziv: Naziv Zakona mijenja se i glasi: **Zakon o posebnim programima Kantona Sarajevo za memorijalizaciju genocida u Srebrenici, podršku povratku i razvoju regije istočna Bosna, pomoći žrtvama i porodicama žrtava genocida nad Bošnjacima zaštićene zone UN "Srebrenica"**.

Član 1.: Član 1. mijenja se i glasi: **Zakonom o posebnim programima Kantona Sarajevo za memorijalizaciju genocida u Srebrenici, podršku povratku i razvoju opština regije istočna Bosna, pomoći žrtvama i porodicama žrtava genocida nad Bošnjacima zaštićene zone UN "Srebrenica"** (u daljem tekstu: zakon) se uređuju mjere Vlade Kantona Sarajevo (u daljem tekstu: Vlada) za usmjerene aktivnosti za održivi povratak, razvojne projekte i obnovu **u jedinicama lokalne samouprave regije istočna Bosna**, mjere podrške aktivnostima istraživanja i obilježavanja genocida u Srebrenici i mjere podsticaja i podrške žrtvama genocida i porodicama žrtava genocida nad Bošnjacima zaštićene zone UN "Srebrenica", licima sa prijavljenim prebivalištem na području **opština regije istočna Bosna**, izbjeglim, raseljenim licima, povratnicima, te licima koja su se vratila sa područja Kantona Sarajevo na područje **jedinica lokalne samouprave regije istočna Bosna** od strane institucija Kantona Sarajevo i njihovim potomcima.

Alternativno: U članu 1. riječi: "razvoju Srebrenice" zamjenjuju se riječima: "razvoju Srebrenice, Bratunca, Milića, Vlasenice, Han Pijeska, Sokoca, Zvornika, Osmaka, Višegrada, Rogatice u bosanskohercegovačkom entitetu Republika Srpska (u daljem tekstu: regija istočne Bosne).

Konstatovano je da će radno tijelo na jednoj od narednih sjednica odlučiti koju od predloženih opcija će ugraditi u tekst Nacrta zakona. Ukoliko se odabere alternativna opcija, potrebno je u članu 4. brisati stav (3).

Član 2.: U članu 2. riječi: "BiH" zamjenjuju se riječima "Bosni i Hercegovini", a riječi: "Sporazum o povratku izbjeglica i raseljenih osoba" zamjenjuju se riječima "Sporazum o izbjeglicama i raseljenim licima".

Član 3.: U članu 3. stav (1) riječi: "u Srebrenici" zamjenjuju se riječima: "u opštini regije istočna Bosna".

U stavu (2) ovog člana riječi: "u Srebrenicu" zamjenjuju se riječima: "opštinu regije istočna Bosna", a riječi: "ekonomski razvoj Srebrenice" zamjenjuju se riječima: "ekonomski razvoj opština regije istočna Bosna".

Član 4.: U članu 4. naziv člana mijenja se i glasi: "Definicije".

Član 5.: Razmatrana je definicija žrtve genocida iz člana 5. stav (1) Zakona u kontekstu ostvarivanja prava prema ovom zakonu. Odlučeno je da se nakon konsultacija sa šefom Ureda eventualno pristupi izmjenama definicije žrtve genocida u pogledu lica koja su ubijena ili nestala u genocidu.

- U članu 5. stav (2) riječi: "Porodicama žrtava genocida" zamjenjuju se riječima "Članovima porodica žrtava genocida".

- U članu 5. stav (3) Zakona, riječi: "jedinice lokalne samouprave Srebrenica" zamjenjuju se riječima: "jedinice lokalne samouprave regije istočna Bosna", riječi: "BiH" zamjenjuju se riječima: "Bosne i Hercegovine", riječ: "Srebrenici" zamjenjuje se riječima: "jedinici lokalne samouprave regije istočna Bosna", a iza riječi: "niti je dobrovoljno", interpunkcijski znak zarez se briše.

- u stavu (4) riječi: "sa područja jedinice lokalne samouprave Srebrenica" zamjenjuju se riječima: "sa područja jedinice lokalne samouprave regije istočna Bosna", riječ: "koje" zamjenjuje se riječju: "koji", riječi: "na području Srebrenice" zamjenjuju se riječima: "sa područja jedinice lokalne samouprave koja pripada regiji istočne Bosne".

- u stavu (5) riječi: "sa područja jedinice lokalne samouprave Srebrenica" zamjenjuju se riječima: "sa područja jedinice lokalne samouprave regije istočna Bosna", riječ: "koja" zamjenjuje se riječju: "koje", riječ: "vratila" zamjenjuje se riječju: "vratilo", a riječ: "BiH" zamjenjuje se riječima: "Bosni i Hercegovini".

- u stavu (6) riječi: "jedinice lokalne samouprave Srebrenica" zamjenjuju se riječima: "jedinice lokalne samouprave regije istočna Bosna".

- u odnosu na stav (8) Radno tijelo je odlučilo da na narednoj sjednici dodatno razmotri postojeću definiciju iz ovog stava, u konsultacijama sa šefom Ureda.

Član 6.: U članu 6. naziv člana se mijenja i glasi: "Ravnopravnost izbjeglih, raseljenih lica, povratnika i lica koja su se vratila sa područja Kantona Sarajevo na područje jedinice lokalne samouprave regije istočna Bosna, njihovih potomaka, žrtava genocida i porodica žrtava genocida".

- u stavu (2) riječi: "opštine Srebrenica" zamjenjuju se riječima: "opštine regije istočna Bosna".

Član 7.: u stavu (1) riječi: "Ured Vlade Kantona Sarajevo za podršku Srebrenici" zamjenjuju se riječima: "Ured Vlade Kantona Sarajevo za podršku regiji istočne Bosne".

Član 8.: u stavu (2) iza riječi "18/13" interpunkcijski znak "zarez" se briše, a stav (4) ovog člana prilagodit će se nakon što se dodatno razmotri definicija iz člana 5. stav (8) Zakona.

Kada je u pitanju član 5. Zakona, konstatovano je da je pojedine stavove ovog člana potrebno posebno razmotriti i eventualno predložiti njihove izmjene radi svrsishodnije i efikasnije primjene Zakona.

Ad. 4

Konstatovano je da rješenje o imenovanju Radnog tijela propisuje obavezu saradnje članova Radnog tijela sa šefom Ureda Vlade Kantona Sarajevo za podršku Srebrenici. S tim u vezi, odlučeno je da se na narednu sjednicu Radnog tijela pozove šef Ureda, kako bi se dodatno razjasnila određena pitanja koja se tiču statusa Ureda Vlade Kantona Sarajevo za podršku Srebrenici, ali i druga pitanja vezana za članove Zakona za koje su članovi Radnog tijela ocijenili da ih je potrebno dodatno razmotriti radi svrsishodnije i efikasnije primjene Zakona.

Radno tijelo utvrdilo je sljedeće

ZAKLJUČKE

1. Zbog potrebe mijenjanja naziva propisa i činjenice da obim izmjena premašuje 50% članova zakona, potrebno je pristupiti izradi potpuno novog zakona.

2. Na narednu sjednicu, Radno tijelo će pozvati šefa Ureda Vlade Kantona Sarajevo za podršku Srebrenici, kako bi se ispoštovala obaveza saradnje iz rješenja o imenovanju, te kako bi se u saradnji sa šefom Ureda razjasnili određeni članovi Zakona koji se tiču statusa lica iz člana 5. Zakona i statusa Ureda, te eventualno i druga pitanja.

Sjednica Radnog tijela završena je u 17:00 sati.

PREDSJEDAVAJUĆI RADNOG TIJELA

ČI

ČI

**Bosna i Hercegovina
Federacija Bosne i Hercegovine
KANTON SARAJEVO**

Radno tijelo za izradu Nacrta Zakona o izmjenama i dopunama Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice, pomoći žrtvama i porodicama žrtava genocida nad Bošnjacima zaštićene zone UN-a "Srebrenica"

**ZAPISNIK
sa druge sjednice Radnog tijela**

Mjesto održavanja: Zgrada Kantona Sarajevo (sala 123), Ul. Reisa Džemaludina Čauševića br. 1

Datum održavanja: 12.03.2026. godine, sa početkom u 16:00 sati

Sjednici Radnog tijela, imenovanog Rješenjem Vlade Kantona Sarajevo, broj: 02-04-6172-34/26 od 26.02.2026. godine, prisustvovali su sljedeći članovi:

1. Dino Mešić, Ministarstvo pravde i uprave Kantona Sarajevo, predsjedavajući
2. Mediha Selimanović, Kabinet predsjedavajućeg i zamjenika predsjedavajućeg Skupštine Kantona Sarajevo, član
3. Nedima Ramović, Kabinet premijera Kantona Sarajevo, član

Sjednici je prisustvovao i šef Ureda Vlade Kantona Sarajevo za podršku Srebrenici, koji je članovima Radnog tijela dao dodatna pojašnjenja u vezi sa pojedinim odredbama Zakona o posebnim programima Kantona Sarajevo za memorijalizaciju genocida u Srebrenici, podršku povratku i razvoju regije istočna Bosna, pomoći žrtvama i porodicama žrtava genocida nad Bošnjacima zaštićene zone UN-a „Srebrenica“, a koja su bila od značaja za dalji tok rada Radnog tijela.

Konstatovano je postojanje kvoruma za odlučivanje, te je predložen i usvojen sljedeći:

DNEVNI RED

1. Konsultacije sa šefom Ureda (informacije, pojašnjenja, važni datumi, status žrtava)
2. Razmatranje i usaglašavanje predloženih izmjena pojedinih odredbi zakona
3. Razno

Dnevni red je jednoglasno usvojen.

Ad. 1

U okviru prve tačke dnevnog reda članovi Radnog tijela razgovarali su sa šefom Ureda Vlade Kantona Sarajevo za podršku Srebrenici, koji je dodatno pojasnio definiciju genocida, odnosno ko se, u smislu zakona, može smatrati žrtvom genocida, odnosno članom porodice žrtve genocida. Tokom razgovora, šef Ureda je iznio primjedbe u vezi sa članovima 5, 10, 11, 12, 13 i 14 važećeg Zakona, te je dogovoreno da iste dostavi Radnom tijelu putem e-maila, kako bi ih Radno tijelo moglo razmotriti u smislu i u okviru zadataka utvrđenih Rješenjem o imenovanju Radnog tijela. Također je pojasnio značaj datuma **30. april 1991. godine**, koji se navodi u članu 5. stav (3) i (4) zakona, ističući da je riječ o datumu popisa stanovništva održanog u martu 1991. godine. Na osnovu evidencije popisa stanovništva, izbjegla lica pribavljaju potvrde o kretanju i koriste ih za dokazivanje svog statusa izbjeglice u skladu sa odredbama Zakona.

Dodatno, članovi Radnog tijela su upoznati i sa problematikom sa kojom se šef Ureda susreo u dosadašnjem obavljanju poslova šefa Ureda, te je dogovoreno da će isti članovima Radnog tijela u što kraćem roku putem emaila dostaviti detaljno obrazložene prepreke sa kojima se susreo u toku svog rada, kao i prijedloge za koje on smatra da trebaju biti uvršteni u Nacrt izmjena i dopuna postojećeg, odnosno Nacrt novog zakona.

Ad. 2

Radno tijelo je u daljem toku sjednice razmatralo odredbe zakona koje se odnose na definisanje statusa lica, programe podrške, kao i odredbe koje se odnose na način provođenja programa.

Član 10.: U članu 10., u svim tačkama u kojima se navode stavovi (1) do (8) člana 5., riječi: "iz člana 5. stav (1), (2), (3), (4), (5), (6), (7) i (8)" zamjenjuju se riječima: "iz člana 5. ovog zakona".

U tački b) riječi: "program podrške infrastrukturnim projektima (elektrifikacija, vodovod i putna infrastruktura) u saradnji sa drugim institucijama na državnom, entitetskom i lokalnom nivou području regije istočna Bosna " zamjenjuju se riječima: "program podrške infrastrukturnim projektima na području regije Istočna Bosna (elektrifikacija, vodovod i putna infrastruktura) u saradnji sa drugim institucijama na državnom, entitetskom i lokalnom nivou".

U tački e) riječi: "program besplatne pravne pomoći putem pravne službe Ureda" zamjenjuju se riječima: "program besplatne pravne pomoći putem Ureda", riječi: "se odnosi" zamjenjuju se riječima: "odnosi se", riječ: "jedinica" zamjenjuje se riječju: "jedinicama", dok se riječi: "BiH" zamjenjuju riječima: "Bosna i Hercegovina".

U tački f) riječi: "jedinice lokalne samouprave Srebrenica" zamjenjuju se riječima: "jedinice lokalne samouprave regije istočna Bosna".

U tački g) riječi: "jedinice lokalne samouprave Srebrenica" zamjenjuju se riječima: "jedinice lokalne samouprave regije istočna Bosna".

U tački h) riječi: "jedinice lokalne samouprave Srebrenica" zamjenjuju se riječima: "jedinice lokalne samouprave regije istočna Bosna", riječ "Srebrenici" zamjenjuje se riječima: "jedinice lokalne samouprave regije istočna Bosna".

U tački j) riječ "fondacija" zamjenjuje se riječju "fondacijama", a riječi: "jedinice lokalne samouprave Srebrenica" zamjenjuju se riječima: "jedinice lokalne samouprave regije istočna Bosna". Dodatno je utvrđeno da je cijelu tačku e) potrebno preformulisati na način da ista sada glasi: „program podrške udruženjima građana i fondacijama za aktivnosti održivog povratka, zaštite ljudskih prava, jačanja građanskog organizovanja i drugih aktivnosti vezanih za borbu protiv diskriminacije i govora mržnje, na području jedinice lokalne samouprave regije istočna Bosna putem javnog poziva (dostupan za prijavu udruženjima građana i fondacijama sa područja Kantona Sarajevo i sa područja jedinice lokalne samouprave regije istočna Bosna) koji planira i realizira Ured“.

Tačka k) riječi: "program učešća u subvencioniranju organizacije javnog prevoza na području jedinice lokalne samouprave Srebrenica, prevoza djece i đaka osnovnih i srednjih škola na području regije istočna Bosna, redovnog autobusnog saobraćaja na liniji Srebrenica-Sarajevo-Srebrenica koju planira i realizira Ured na osnovu javnog poziva, koji je otvoren za sva privredna društva koja ispunjavaju uslove za provedbu aktivnosti ove vrste transporta putnika" zamjenjuju se riječima: "program učešća u subvencioniranju organizacije javnog prevoza na području opština regije Istočna Bosna, prevoza djece i đaka osnovnih i srednjih škola, te redovnog autobusnog saobraćaja unutar regije Istočna Bosna i na linijama koje povezuju regiju Istočna Bosna sa Sarajevom, koje planira i realizira Ured na osnovu javnog poziva, otvorenog za sva privredna društva koja ispunjavaju uslove za provedbu aktivnosti ove vrste transporta putnika".

Član 11.: Naziv člana mijenja se i glasi: "Ured Vlade Kantona Sarajevo za podršku Srebrenici i drugim opštinama regije istočna Bosna".

U stavu (2) brišu se riječi "u Srebrenici i kancelarije", a stav (4) se briše te će isti biti regulisan u prelaznim i završnim odredbama Zakona.

**Bosna i Hercegovina
Federacija Bosne i Hercegovine
KANTON SARAJEVO**

Radno tijelo za izradu Nacrta Zakona o izmjenama i dopunama Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice, pomoći žrtvama i porodicama žrtava genocida nad Bošnjacima zaštićene zone UN-a "Srebrenica"

**ZAPISNIK
sa treće sjednice Radnog tijela**

Mjesto održavanja: Zgrada Kantona Sarajevo (sala 100), Ul. Reisa Džemaludina Čauševića br. 1

Datum održavanja: 24.03.2026. godine, sa početkom u 16:00 sati

Sjednici Radnog tijela, imenovanog Rješenjem Vlade Kantona, broj: 02-04-6172-34/26 od 26.02.2026. godine, prisustvovali su sljedeći članovi:

1. Dino Mešić, Ministarstvo pravde i uprave Kantona Sarajevo, predsjedavajući
2. Mediha Selimanović, Kabinet predsjedavajućeg i zamjenika predsjedavajućeg Skupštine Kantona Sarajevo, član
3. Nedima Ramović, Kabinet premijera Kantona Sarajevo, član

Konstatovano je postojanje kvoruma za odlučivanje, te je predložen i usvojen sljedeći:

DNEVNI RED

1. Usvajanje Zapisnika sa druge sjednice Radnog tijela,
2. Nastavak rada na usklađivanju Nacrta Zakona o izmjenama i dopunama Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice, pomoći žrtvama i porodicama žrtava genocida nad Bošnjacima zaštićene zone UN-a "Srebrenica",
3. Razno.

Dnevni red je jednoglasno usvojen.

Ad. 1

Članovi Radnog tijela su jednoglasno usvojili Zapisnik sa druge sjednice Radnog tijela, prethodno usaglašen između članova Radnog tijela.

Ad. 2

U nastavku sjednice članovi Radnog tijela su nastavili rad na usklađivanju Nacrta Zakona te je predloženo i usvojeno sljedeće:

Ispred rimskih brojeva poglavlja dodati će se riječ: „POGLAVLJE“, u skladu sa Pravilima i postupcima za izradu zakona i drugih propisa.

Član 1.: Cjelokupan naziv zakona se neće navoditi, te će se određivanje izvršiti riječima: "Ovim zakonom". Ujedno je promijenjen redoslijed rečenica, kao i teritorijalni obuhvat zakona (riječi: jedinica lokalne samouprave Srebrenica zamijenjene su riječima jedinice lokalne samouprave regije istočna Bosna), te čl. 1. sada glasi: "Ovim zakonom se uređuju mjere podrške Vlade Kantona Sarajevo (u daljem tekstu: Vlada) aktivnostima istraživanja i obilježavanja genocida u Srebrenici i mjere podsticaja i podrške žrtvama genocida i porodicama žrtava genocida nad Bošnjacima zaštićene zone UN "Srebrenica", mjere za održivi povratak, razvojne projekte i obnovu u jedinicama lokalne samouprave regije istočna Bosna, licima sa prijavljenim prebivalištem na području opština regije istočna Bosna, izbjeglim, raseljenim licima, povratnicima, te licima koja su se vratila sa područja Kantona Sarajevo na područje jedinica lokalne samouprave regije istočna Bosna od strane institucija Kantona Sarajevo i njihovim potomcima."

Član 4.: U članu 4. stavu (3) riječ: „Regija“ zamjenjuje se sa "Regijom“.

Član 5.: U članu 5. stavu (2) riječi: „Porodicama žrtava genocida“ zamjenjuju se sa: „Članovima porodica žrtava genocida“

U odnosu na stav (8) ovog člana Radno tijelo je konstatovalo da se i dalje čeka odgovor šefa Ureda, da bi se odlučilo da li će se ovaj stav zadržati obzirom da bi se širenjem Zakona na teritoriju cijele regije istočne Bosne uveliko povećao broj potencijalnih kandidata na programima. Nakon odgovora šefa Ureda, odnosno po mogućnosti održanog sastanka sa istim, ovo pitanje će biti usaglašeno.

Dodaje se novi član 5a. (**Rodna neutralnost izraza**) te isti glasi: „Izrazi koji se koriste u ovom zakonu, a imaju rodno značenje koriste se neutralno i odnose se jednako na muški i ženski rod.“ Po usaglašavanju cjelokupnog teksta Nacrta, odnosno novog Zakona, bit će izvršena finalna numeracija svih članova.

Član 6.: u vezi sa prednje navedenim razmotriće se i zadržavanje, odnosno brisanje, stava (2) člana 6. obzirom da je isto u svezi sa čl. (5) st. (8).

Član 7.: Iz člana 7. odredbe koje se odnose na rokove provođenja konsultacija u vezi sa izradom Uredbe za izdavanje potvrda o statusu žrtava genocida i/ili porodica žrtava genocida nad Bošnjacima zaštićene zone UN-a "Srebrenica", kao i na donošenje navedene uredbe, bit će premještene u prijelazne odredbe Nacrta zakona, kako to nalažu nomotehnička pravila. Ujedno se dodaje novi stav, te član 7. sada glasi:

„(1) Lica iz člana 5. st. (1) i (2) ovog zakona svoj status dokazuju potvrdom koju izdaje Ured Vlade Kantona Sarajevo za podršku Srebrenici i drugim opštinama regije istočna Bosna (u daljem tekstu: Ured).

(2) Lica iz člana 5. st. (1) i (2) ovog zakona nisu dužna da dokazuju svoje prijeratno ili trenutno prebivalište na području jedinice lokalne samouprave Srebrenica.

(3) Postupak, uslovi i način izdavanja potvrde iz stava (1) ovog člana detaljnije se propisuju Uredbom za izdavanje potvrda o statusu žrtava genocida i/ili porodica žrtava genocida nad Bošnjacima zaštićene zone UN-a "Srebrenica", koju donosi Vlada.“

Član 8.: stav (4) potrebno je razmotriti obzirom da se isti odnosi na lica iz člana 5. stav (8) Zakona.

Član 10.: Tačka j) preformulisana je s obzirom da se prema dosadašnjoj odredbi pružala podrška borbi protiv građanskog organizovanja, što vjerovatno nije bila intencija ove odredbe, te ista sada glasi: „program podrške udruženjima građana i fondacijama za aktivnosti održivog povratka, zaštite ljudskih prava, jačanja građanskog organizovanja i drugih aktivnosti vezanih za borbu protiv diskriminacije i govora mržnje, na području jedinice lokalne samouprave regije istočna Bosna putem javnog poziva (dostupan za prijavu udruženjima građana i fondacijama sa područja Kantona Sarajevo i sa područja jedinice lokalne samouprave regije istočna Bosna) koji planira i realizira Ured“.

Član 11.: Konstatovano je da odredbe koje su po svojoj prirodi prijelazne trebaju biti premještene u odgovarajuće poglavlje, kao i da je potrebno brisati odredbe koje su predmet Zakona o državnoj službi u

Kantona Sarajevo, te je njihovo navođenje u ovom Zakonu suvišno. Shodno konstatovanom, usaglašeno je da ovaj član sada glasi:

“(1) Ured ima sjedište u Sarajevu.

(2) Ured ima najmanje šest zaposlenika, i to: Šefa Ureda, četiri državna službenika i jednog namještenika, a što će se detaljnije urediti pravilnikom o unutrašnjoj organizaciji Ureda.

(3) Prednost pri zaposlenju u Uredu imaju lica koja ispunjavaju uslove iz člana 5. ovog zakona.

(4) O rezultatima rada provođenja Plana i programa mjera propisanih ovim zakonom, šef Ureda izvještava Vladu i Skupštinu Kantona Sarajevo, najkasnije do 31.03. tekuće godine za prethodnu godinu.”

Član 12.: st. (4), (5) i (6) su već sadržani u članu 13. Zakona, te se brišu iz ovog člana. Dogovoreno je da će se Radno tijelo o ovom pitanju svakako dodatno konsultovati sa šefom Ureda.

Usaglašeno je da se poglavlja V i VI spoje u jedno Poglavlje V, u skladu sa Pravilima i postupcima za izradu zakona i drugih propisa.

Član 13.: Sa šefom Ureda usaglašeno je da, ukoliko se mjere iz Plana i programa reliziraju putem javnog poziva, komisiju u tom slučaju imenuje šef Ureda, a ne premijer Kantona, kako je to do sada bilo regulisano. Dodatno, s obzirom da se u ovim slučajevima radi o preliminarnim listama, umjesto prava na žalbu potrebno je da stoji pravo na prigovor, kao i da o istima odlučuje šef Ureda, pa ovaj član sada glasi:

“(1) Programi podrške iz člana 11. ovog zakona mogu se realizovati na jedan od slijedećih načina:

a) putem javnih poziva;

b) u saradnji sa opštinskim/općinskim, gradskim, entitetskim ili državnim vlastima na osnovu prethodno potpisanog Memoranduma o saradnji;

c) kontinuirana podrška na osnovu potreba lica iz člana 5. ovog zakona.

(2) Plan i program iz člana 11. ovog zakona obavezno sadrži načine realizacije iz stava (1) ovog člana.

(3) Ukoliko se mjera iz Plana i programa realizira putem javnog poziva iz tačke a) stava (1) ovog člana, isti se provodi putem Komisije za provođenje javnog poziva (u daljem tekstu: Komisija) koju imenuje šef Ureda posebnim rješenjem sa utvrđenim zadacima i rokovima za provođenje procedure. Procedura objavljivanja, trajanje i sadržaj teksta javnog poziva, dodatna obavještenja po javnom pozivu i dostavljanje zahtjeva se provodi u skladu sa pozitivnim zakonskim i podzakonskim propisima.

(4) Preliminarne rezultate javnog poziva utvrđuje komisija, a objavljuje šef Ureda na internet stranici Ureda. O prigovorima na preliminarnu listu javnog poziva odlučuje šef Ureda nakon čega donosi konačnu odluku o rezultatima javnog poziva.

(5) Način rada, odlučivanje i druga pitanja od značaja za rad Komisije regulišu se poslovníkom o radu Komisije, koji se donosi na konstituirajućoj sjednici Komisije.”

Dalje je usaglašeno da se promijeni naziv poglavlja: “Nadzor nad primjenom zakona” u “Nadzor” i da se isti sada sastoji od dva člana, sve u skladu sa Pravilima i postupcima za izradu zakona i drugih propisa. Shodno tome, dosadašnji član 15. postaje čl. 16. i 17., pa ovo poglavlje glasi:

„POGLAVLJE VI – NADZOR

Član 16.

(Nadzor nad primjenom zakona)

Nadzor nad primjenom ovog zakona u smislu praćenja realizacije programa i projekata iz Plana i programa vrši Ministarstvo za rad, socijalnu politiku, raseljena lica i izbjeglice Kantona Sarajevo.

Član 17.

(Inspeksijski nadzor)

Inspeksijski nadzor nad primjenom ovog zakona vrši Kantonalna uprava za inspeksijske poslove, Upravni inspektorat Ministarstva pravde i uprave Kantona Sarajevo i Budžetski inspektorat Ministarstva finansija Kantona Sarajevo, u skladu sa svojim nadležnostima.”

Poglavlje IX koje se odnosi na prijelazne i završne odredbe se mijenja i glasi:

„POGLAVLJE VIII – PRIJELAZNE I ZAVRŠNE ODREDBE

Član 20.

(Pravni kontinuitet Ureda)

(1) Ured Vlade Kantona Sarajevo za podršku Srebrenici, osnovan Uredbom o osnivanju Ureda Vlade Kantona Sarajevo za podršku Srebrenici ("Službene novine Kantona Sarajevo", broj 29/22), nastavlja sa radom u skladu sa ovim zakonom i pod novim nazivom, te preuzima državne službenike, arhivu, dokumentaciju i sredstva za rad, odnosno sva prava i obaveze koje je isti imao na dan stupanja na snagu ovog zakona.

(2) Vlada će u roku od 60 dana od dana stupanja na snagu ovog zakona donijeti Uredbu o osnivanju Ureda Vlade Kantona Sarajevo za podršku Srebrenici i drugim opštinama regije istočna Bosna.

(3) Šef Ureda će, u roku od 30 dana od dana stupanja na snagu uredbe iz stava (2) ovog člana, donijeti Pravilnik o unutrašnjoj organizaciji Ureda.

Član 21.

(Započeti postupci)

Postupci koji su započeti prije stupanja na snagu ovog zakona, a koji do dana njegovog stupanja na snagu nisu okončani, okončat će se po odredbama zakona koji je bio na snazi u vrijeme pokretanja postupka.

Član 22.

(Donošenje podzakonskog akta)

(1) Ured će, najkasnije u roku od 60 dana od dana stupanja na snagu ovog zakona, provesti konsultacije sa udruženjima porodica žrtava genocida, memorijalima, akademskom zajednicom i organizacijama civilnog društva u svrhu izrade prijedloga uredbe iz člana 8. stav (3) ovog zakona.

(2) Ured je dužan prijedlog uredbe iz stava (1) ovog člana dostaviti Vladi na razmatranje i usvajanje najkasnije u roku od 150 dana od dana stupanja na snagu ovog zakona.

(3) Vlada će donijeti uredbu iz stava (1) ovog člana najkasnije u roku od 180 dana od dana stupanja na snagu ovog zakona.

Član 23.
(Prestanak važenja drugih propisa)

Danom stupanja na snagu ovog zakona prestaje da važi Zakon o posebnim programima Kantona Sarajevo za memorijalizaciju genocida, podršku povratku i razvoju Srebrenice, pomoći žrtvama i porodicama žrtava genocida nad Bošnjacima zaštićene zone UN "Srebrenica" ("Službene novine Kantona Sarajevo", broj 18/22).

Član 24.
(Stupanje na snagu)

Ovaj Zakon stupa na snagu osmog dana od dana objavljivanja u "Službenim novinama Kantona Sarajevo".

Ad. 3

Konstatovano je da do dana održavanja ove sjednice šef Ureda nije dostavio pisano obavještenje o problemima u dosadašnjoj primjeni Zakona, te da će se sa istim još jednom stupiti u kontakt kako bi navedeno bilo dostavljeno i razmotreno do kraja roka na koji je imenovano ovo Radno tijelo, te kako bi se preostala pitanja mogla riješiti u ostavljenom roku.

Shodno navedenom, Radno tijelo utvrdilo je sljedeće:

ZAKLJUČKE

1. Nastaviti rad na usaglašavanju teksta Nacrta zakona.
2. Na narednu sjednicu pozvati šefa Ureda Vlade Kantona Sarajevo za podršku Srebrenici, kako bi se razjasnile preostale nedoumice i članovi Zakona, te eventualno i druga potrebna pitanja.

Sjednica Radnog tijela završena je u 17:00 sati.

PREDSJEDAVAJUĆI RADNOG TIJELA

ČL

ČL



Bosna i Hercegovina
Federacija Bosne i Hercegovine
KANTON SARAJEVO

Radno tijelo za izradu Nacrta Zakona o izmjenama i dopunama Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice, pomoći žrtvama i porodicama žrtava genocida nad Bošnjacima zaštićene zone UN-a "Srebrenica"

ZAPISNIK
sa četvrte sjednice Radnog tijela

Mjesto održavanja: Zgrada Kantona Sarajevo (sala 100), Ul. Reisa Džemaludina Čauševića br. 1

Datum održavanja: 27.03.2026. godine, sa početkom u 16:00 sati

Sjednici Radnog tijela, imenovanog Rješenjem Vlade Kantona, broj: 02-04-6172-34/26 od 26.02.2026. godine, prisustvovali su sljedeći članovi:

1. Dino Mešić, Ministarstvo pravde i uprave Kantona Sarajevo, član
2. Mediha Selimanović, Kabinet predsjedavajućeg i zamjenika predsjedavajućeg Skupštine Kantona Sarajevo, član
3. Nedima Ramović, Kabinet premijera Kantona Sarajevo, član

Sjednici je prisustvovao i šef Ureda Vlade Kantona Sarajevo za podršku Srebrenici, gosp. Mirza Ibrahimović, koji je članovima Radnog tijela dao dodatna pojašnjenja u vezi sa predloženim izmjenama, odnosno dopunama Zakona o posebnim programima Kantona Sarajevo za memorijalizaciju genocida u Srebrenici, podršku povratku i razvoju regije istočna Bosna, pomoći žrtvama i porodicama žrtava genocida nad Bošnjacima zaštićene zone UN-a „Srebrenica“, koje su dostavljene Radnom tijelu putem e-maila 26.03.2026. godine.

Konstatovano je postojanje kvoruma za odlučivanje, te je predložen i usvojen sljedeći:

DNEVNI RED

1. Usvajanje zapisnika sa treće sjednice Radnog tijela,
2. Razmatranje i usaglašavanje predloženih izmjena Zakona, dostavljenih od strane šefa Ureda Vlade Kantona Sarajevo za podršku Srebrenici,
3. Nastavak rada na pripremi Nacrta Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice i drugih opština regije istočna Bosna, pomoći žrtvama i porodicama žrtava genocida nad Bošnjacima zaštićene zone UN-a "Srebrenica",
4. Razno.

Dnevni red je jednoglasno usvojen.

Ad. 1

Članovi Radnog tijela su jednoglasno usvojili Zapisnik sa treće sjednice Radnog tijela, prethodno usaglašen između članova Radnog tijela.

Ad. 2

U okviru druge tačke dnevnog reda šef Ureda Vlade Kantona Sarajevo za podršku Srebrenici obrazložio je dodatno prijedloge za izmjene, odnosno dopune Zakona, koje je prethodno dostavio putem e-maila, dana 26.03.2026. godine.

Šef Ureda je iznio problematiku vezanu za primjenu važećeg zakona, navodeći pri tome posebno član 7. Zakona koji propisuje dokazivanje statusa žrtve genocida ili porodice žrtve genocida. Ukazano je da Uredba za izdavanje potvrda o statusu žrtava genocida i/ili porodica žrtava genocida nad Bošnjacima zaštićene zone UN-a Srebrenica nikada nije usvojena. Kao razlog navedeno je, između ostalog, nemogućnost propisivanja načina dokazivanja, s obzirom da ne postoje zvanični registri žrtava genocida. S tim u vezi, predloženo je da Radno tijelo u Nacrtu zakona briše navedene odredbe koje se tiču načina dokazivanja statusa ovih lica, na način kako je to propisano u važećem zakonu. Predloženo je da se član 7. mijenja i glasi: "*Lica iz člana 5. st. (1) i (2) ovog zakona svoj status dokazuju potvrdama nadležnih organa, ovjerenim izjavama, te drugom dokumentacijom koju Ured Vlade Kantona Sarajevo za podršku Srebrenici (u daljem tekstu: Ured) ocijeni relevantnom.*"

Radno tijelo je ocijenilo predloženu izmjenu nedovoljno preciznom, te utvrdilo da postojeća rješenja u Zakonu ostavljaju mogućnost za efikasnije mehanizme i mogućnosti propisivanja postupka dokazivanja statusa navedenih lica, donošenjem podzakonskog akta, nakon provedenih konsultacija sa relevantnim udruženjima.

Predloženo je brisanje odredbe člana 5. stav (8) Zakona, koja se odnosi na druga lica koja imaju prijavljeno prebivalište na području opštine Srebrenica, a ne ispunjavaju uslove statusa po drugim osnovama navedenim u st. (1), (2), (3), (4), (5), (6) i (7) ovog člana, te člana 6. stav (2) Zakona, koji propisuje da sva lica koja imaju prijavljeno prebivalište na području opštine Srebrenica, a ne ispunjavaju uslove za dokazivanje statusa po osnovu člana 5. st. (1), (2), (3), (4), (5), (6) i (7) ovog zakona mogu ostvariti prava na način utvrđen ovim zakonom. Prijedlog je obrazložen time da se radi o licima koja ne spadaju u žrtve i porodice žrtava genocida, kao ni u kategoriju izbjeglica, raseljenih lica, povratnika ili njihovih potomaka. Uzimajući u obzir predmet i svrhu zakona da se programi podrške primarno odnose na navedena lica, predloženo je brisanje lica iz člana 5. stav (8) i člana 6. stav (2), čiji bi broj, naročito proširenjem teritorijalnog obuhvata, premašio broj lica na koja se Zakon primarno odnosi.

Radno tijelo ocijenilo je navedeni prijedlog opravdanim, te su u skladu sa tim brisane odredbe koje se tiču člana 5. stav (8) Zakona i člana 6. stav (2) Zakona.

Kada je u pitanju član 10. tačka k) Zakona, ukazano je da je nepotrebno širiti teritorijalni obuhvat u vezi sa linijama koje povezuju opštine regije istočna Bosna sa Sarajevom. Jedino opština Srebrenica nema uspostavljenu liniju sa Sarajevom, te je intencija Zakona bila da se iz tog razloga isključivo navedena linija subvencionira.

U odnosu na čl. 12. i 13. Zakona koji uređuju Plan i program, te postupak realizacije programa, šef Ureda je predložio da se propiše da preliminarne rezultate javnog poziva utvrđuje rukovodilac ureda i objavljuje na internet stranici Vlade, te da o žalbama na preliminarnu listu javnog poziva odlučuje posebna komisija za žalbe koju imenuje Vlada, nakon čega se donosi konačna odluka o rezultatima javnog poziva.

Radno tijelo je istaklo da je Uredbom o dodjeli transfera neprofitnim organizacijama i pojedincima iz Budžeta Kantona Sarajevo ("Službene novine Kantona Sarajevo", br. 22/21, 13/22, 21/24, 10/25 i 6/26) propisano, između ostalog, da postupak javnog poziva provodi komisija, da listu prijave dostavlja rukovodiocu davaoca sredstava, te da se prigovor izjavljuje rukovodiocu davaoca sredstava. S tim u vezi, Radno tijelo je ocijenilo da nije svrshodno mijenjati odredbe koje se tiču provođenja postupka dodjele sredstava izuzev u dijelu koji se odnosi na imenovanje komisije za provođenje javnog poziva.

Također, predloženo je da se član 14. stav (1) Zakona dopuni odredbom "novčane dotacije viših nivoa vlasti". Radno tijelo je ukazalo da prema odredbama važećeg Zakona, izvori sredstava čine i ostali izvori u skladu sa zakonom (član 14. stav (1) tačka e) Zakona), te da se predloženo može podvesti pod navedenu odredbu. U istom članu predložena je izmjena godišnjeg iznosa sredstava koji se obezbjeđuje u Budžetu, i to u iznosu od 4.000.000,00 KM umjesto 2.000.000,00 kako je propisano u važećem zakonu.

Ad. 3

U okviru treće tačke dnevnog reda, Radno tijelo je uvrstilo sljedeće izmjene u tekstu Nacrta zakona:

Naziv: Zakon o posebnim programima Kantona Sarajevo za memorijalizaciju genocida, podršku povratku i razvoju Srebrenice i drugih opština regije istočna Bosna, pomoći žrtvama i porodicama žrtava genocida nad Bošnjacima zaštićene zone UN "Srebrenica"

Član 5. - Brisane su odredbe koje se odnose na druga lica koja imaju prijavljeno prebivalište na području opštine Srebrenica, a ne ispunjavaju uslove statusa po drugim osnovama navedenim u st. (1), (2), (3), (4), (5), (6) i (7) ovog člana. (član 5. stav (8) Zakona)

Član 6. - Brisane su odredbe koje se propisuju da sva lica koja imaju prijavljeno prebivalište na području opštine regije istočna Bosna, a ne ispunjavaju uslove za dokazivanje statusa po osnovu člana 5. st. (1), (2), (3), (4), (5), (6) i (7) ovog zakona mogu ostvariti prava na način utvrđen ovim zakonom (Član 6. stav (2) Zakona).

Član 9. - Brisane su odredbe koje se odnose na član 5. stav (8) Zakona.

Član 10. - U tački h) brisane su odredbe koje se odnose na član 5. stav (8) Zakona. U tački k), nakon konsultacija sa šefom Ureda, nije proširen teritorijalni obuhvat kada je u pitanju autobuski saobraćaj na liniji Srebrenica - Sarajevo - Srebrenica. U tački l) brisane su odredbe koje se odnose na član 5. stav (8) Zakona.

Čl. 12. i 13. - Propisano je provođenje javnog poziva na način kako je to uređeno Uredbom o dodjeli transfera neprofitnim organizacijama i pojedincima iz Budžeta Kantona Sarajevo ("Službene novine Kantona Sarajevo", br. 22/21, 13/22, 21/24, 10/25 i 6/26).

Član 14. - U stavu (2) ovog člana izmijenjen je godišnji iznos sredstava, na prijedlog šefa Ureda, tako da stav (2) glasi: "(2) Godišnji iznos sredstava koji se obezbjeđuje u Budžetu za finansiranje Plana i programa ne može biti manji od 4.000.000,00 KM za finansiranje mjera iz člana 11. ovog zakona."

Član 17. - Stav (2) preformulisan je tako da glasi: "(2) Novčanom kaznom u iznosu od 500,00 KM do 5.000,00 KM kaznit će se za prekršaj lica koje dostavi netačne ili neistinite podatke ili poduzme druge radnje s ciljem dovođenja u zabludu nadležnog organa radi ostvarivanja nepripadajuće koristi po odredbama ovog zakona."

Ad. 4

Konstatovano je da rok od 30 dana za izvršenje zadatka ističe 28.03.2026. godine (subota). Imajući u vidu navedeno, Izvještaj o radu Radnog tijela i tekst Nacrta zakona, Radno tijelo će dostaviti Kabinету premijera u petak, 27.03.2026. godine, radi predaje materijala za razmatranje na sjednici Vlade Kantona Sarajevo.

Radno tijelo utvrdilo je sljedeće

ZAKLJUČKE

1. Pripremiti Nacrt Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice i drugih opština regije istočna Bosna, pomoći žrtvama i porodicama žrtava genocida nad Bošnjacima zaštićene zone UN "Srebrenica", u skladu sa prijedlozima sa četvrte sjednice Radnog tijela do petka, 27.03.2026. godine.
2. Pripremiti i usvojiti Izvještaj o radu Radnog tijela do petka, 27.03.2026. godine.
3. Dostaviti Nacrt Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice i drugih opština regije istočna Bosna, pomoći žrtvama i porodicama žrtava genocida nad Bošnjacima zaštićene zone UN "Srebrenica" i Izvještaj o radu Radnog tijela, zajedno sa zapisnicima i radnim materijalom, Kabinету premijera u petak, 27.03.2026. godine.

Sjednica Radnog tijela završena je u 17:30 sati.

PREDSJEDAVAJUĆI RADNOG TIJELA



**BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO**

Radno tijelo za izradu Nacrta Zakona o izmjenama i dopunama Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice, pomoći žrtvama i porodicama žrtava genocida nad Bošnjacima zaštićene zone UN-a "Srebrenica"

Datum: 27.03.2026. godine

IZVJEŠTAJ

o radu Radnog tijela za izradu Nacrta Zakona o izmjenama i dopunama Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice, pomoći žrtvama i porodicama žrtava genocida nad Bošnjacima zaštićene zone UN-a "Srebrenica"

Sarajevo, mart 2026. godine

1. UVOD

Vlada Kantona Sarajevo je na 117. sjednici održanoj 26.02.2026. godine donijela Rješenje o imenovanju Radnog tijela za izradu Nacrta Zakona o izmjenama i dopunama Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice, pomoći žrtvama i porodicama žrtava genocida nad Bošnjacima zaštićene zone UN-a "Srebrenica".

Navedenim rješenjem u Radno tijelo imenovani su predstavnici Ministarstva pravde i uprave Kantona Sarajevo, Kabineta predsjedavajućeg i zamjenika predsjedavajućeg Skupštine Kantona Sarajevo i Kabineta premijera Kantona Sarajevo. Kao osnovni zadatak Radnog tijela definisana je izrada Nacrta Zakona o izmjenama i dopunama Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice, pomoći žrtvama i porodicama žrtava genocida nad Bošnjacima zaštićene zone UN-a "Srebrenica" (u daljem tekstu: Nacrt Zakona), u skladu sa zastupničkom inicijativom predsjedavajućeg Skupštine Kantona Sarajevo.

Pored navedenog, Radnom tijelu je ostavljena mogućnost predlaganja i drugih izmjena i dopuna koje se smatraju korisnim za svrsishodniju i efikasniju primjenu predmetnog zakona. Također, Rješenjem je utvrđena obaveza saradnje Radnog tijela sa šefom Ureda Vlade Kantona Sarajevo za podršku Srebrenici, prilikom izvršenja zadatka Radnog tijela.

Rješenjem je određen rok od 30 dana za ispunjenje radnog zadatka, te obaveza prezentacije izvještaja o radu Radnog tijela na sjednici Vlade, od strane predsjedavajućeg Radnog tijela ili drugog člana ako Radno tijelo tako usaglasí.

2. IMENOVANJE RADNOG TIJELA ZA IZRADU NACRTA ZAKONA

Radno tijelo za izradu Nacrta Zakona o izmjenama i dopunama Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice, pomoći žrtvama i porodicama žrtava genocida nad Bošnjacima zaštićene zone UN-a "Srebrenica" imenovano je Rješenjem Vlade Kantona Sarajevo o imenovanju Radnog tijela broj: 02-04-6172-34/26 od 26.02.2026. godine.

Rješenjem Vlade Kantona Sarajevo, u radno tijelo su imenovani sljedeći članovi:

1. Dino Mešić, šef Odjeljenja za procjenu uticaja i izradu propisa u Sektoru za propise, Ministarstvo pravde i uprave,
2. Mediha Selimanović, stručni savjetnik za pravne i opće poslove u Kabinetu predsjedavajućeg i zamjenika predsjedavajućeg Skupštine Kantona Sarajevo i
3. Nedima Ramović, stručni savjetnik za pravne i opće poslove u Kabinetu premijera Kantona Sarajevo.

3. PRVA SJEDNICA RADNOG TIJELA

U skladu sa dnevnim redom, na prvoj sjednici Radnog tijela izabran je predsjedavajući Radnog tijela i usvojen je Poslovnik o radu Radnog tijela, nakon čega se pristupilo analizi Inicijative predsjedavajućeg Skupštine Kantona Sarajevo za izmjenu Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice, pomoći žrtvama i porodicama žrtava genocida nad Bošnjacima zaštićene zone UN-a "Srebrenica" (u daljem tekstu: Zakon) i radu na usklađivanju teksta Zakona sa prijedlozima iz inicijative.

Na sjednici su doneseni sljedeći zaključci:

1. Zbog potrebe mijenjanja naziva propisa i činjenice da obim izmjena premašuje 50% članova zakona, potrebno je pristupiti izradi potpuno novog zakona.
2. Na narednu sjednicu, Radno tijelo će pozvati šefa Ureda Vlade Kantona Sarajevo za podršku Srebrenici, kako bi se ispoštovala obaveza saradnje iz rješenja o imenovanju, te kako bi se u saradnji sa šefom Ureda razjasnili određeni članovi Zakona koji se tiču statusa lica iz člana 5. Zakona i statusa Ureda, te eventualno i druga pitanja.

4. AKTIVNOSTI RADNE GRUPE

U periodu od 11.03.2026. godine do 27.03.2026. godine radno tijelo je održalo ukupno četiri sastanka. Razmjena radnog materijala vršena je na sjednicama Radnog tijela i elektronskim putem.

Ovim izvještajem prikazat će se aktivnosti Radnog tijela struktuirano, po zadacima kako su utvrđeni Rješenjem o imenovanju, i to:

1. Izrada Nacrta zakona u skladu sa Inicijativom predsjedavajućeg Skupštine Kantona Sarajevo,
2. Prijedlog drugih izmjena i dopuna koje se smatraju korisnim za svrsishodniju i efikasniju primjenu predmetnog zakona i
3. Saradnja sa šefom Ureda.

4.1. Izrada Nacrta zakona u skladu sa Inicijativom predsjedavajućeg Skupštine Kantona Sarajevo

Radna grupa analizirala je Inicijativu predsjedavajućeg Skupštine Kantona Sarajevo, gosp. Elvedina Okerića, kojom se predlažu izmjene i dopune Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice, pomoći žrtvama rata i porodicama žrtava genocida nad Bošnjacima zaštićene zone UN "Srebrenica" ("Službene novine Kantona Sarajevo", broj 18/22).

U navedenoj inicijativi je ukazano da važeći zakon ima nekoliko ograničenja u svojoj primjeni. Jedno od ograničenja tiče se njegovog teritorijalnog obuhvata, s obzirom da se odnosi isključivo na općinu Srebrenica, iako su stradanja, progon i demografske posljedice genocida podjednako pogodile i susjedne općine regije istočne Bosne (Bratunac, Milići, Vlasenica, Han Pijesak, Sokolac, Zvornik, Osmaci, Višegrad, Rogatica u bosanskohercegovačkom entitetu Republika Srpska).

Drugi nedostatak tiče se sjedišta Ureda koje se po važećem zakonu treba nalaziti u Srebrenici. Imajući u vidu propise o nadležnosti i budžetskom poslovanju, u Inicijativi se predlaže da sjedište bude u Sarajevu.

S obzirom da je Radno tijelo prilikom razmatranja Inicijative utvrdilo da je potrebno mijenjati više od 50% članova važećeg zakona, kao i sam naziv zakona, shodno odredbama Pravila i postupaka za izradu zakona i drugih propisa Federacije Bosne i Hercegovine ("Službene novine Federacije Bosne i Hercegovine", broj 71/14), pristupilo se izradi novog zakona. Promijenjen je naziv zakona, tako da glasi: Zakon o posebnim programima Kantona Sarajevo za memorijalizaciju genocida, podršku povratku i razvoju Srebrenice i drugih opština regije istočna Bosna, pomoći žrtvama i porodicama žrtava genocida nad Bošnjacima zaštićene zone UN "Srebrenica". Kako bi se ispoštovala namjera iz Inicijative, svi članovi važećeg zakona koji su se odnosili na opštinu Srebrenica, mijenjani su na način da se odnose na općine koje pripadaju regiji istočne Bosne. Od toga su izuzeti članovi zakona koji tretiraju opštinu Srebrenica u kontekstu genocida, uvažavajući činjenicu da je presudom Međunarodnog suda genocid pravno utvrđen za tu opštinu.

Nadalje, promijenjen je naziv Ureda Vlade Kantona Sarajevo za podršku Srebrenici u Ured Vlade Kantona Sarajevo za podršku Srebrenici i drugim opštinama regije istočna Bosna.

U odnosu na drugi dio Inicijative, u Nacrtu zakona je propisano da Ured ima sjedište u Sarajevu. U konsultacijama sa šefom Ureda utvrđeno je da navođenje kancelarija Ureda u zakonu nije neophodno.

4.2. Prijedlog drugih izmjena i dopuna koje se smatraju korisnim za svrsishodniju i efikasniju primjenu predmetnog zakona

Radno tijelo je tokom rada na izradi Nacrta zakona utvrdilo niz nedostataka nomotehničke prirode u važećem tekstu zakona, koji su detaljno navedeni u zapisnicima sa sjednica koji se nalaze u prilogu ovog izvještaja.

Ključni nedostatak identifikovan je u članovima 12. i 13. Zakona, koji sadrže duplicirane odredbe o provođenju mjera iz Plana i programa putem javnog poziva, dok se pojedini dijelovi istih pitanja uređuju na kontradiktoran način. Kako bi se otklonile nedoumice u primjeni, predloženo je da se član 12. fokusira isključivo na donošenje i sadržaj Plana i programa, a da se članom 13. precizno uredi procedura javnog poziva, jasno definišući ko provodi postupak, ko utvrđuje preliminarne rezultate javnog poziva, a ko rješava po prigovoru/žalbi. S tim u vezi, utvrđeno je da je potrebno izvršiti izmjenu člana 13. st. (3) i (4) Zakona na način da se propiše da se javni poziv provodi putem komisije za provođenje javnog poziva koju imenuje šef Ureda, a da o prigovorima na preliminarnu listu javnog poziva odlučuje šef Ureda, nakon čega donosi konačnu odluku o rezultatima javnog poziva. Također, propisano je da se objavljivanje rezultata javnog poziva vrši na internet stranici Ureda, kao davaoca sredstava. Sve navedeno predloženo je kako bi se propisalo postupanje na način kako je to već definisano u Uredbi o dodjeli transfera neprofitnim organizacijama i pojedincima iz Budžeta Kantona Sarajevo ("Službene novine Kantona Sarajevo", br. 22/21, 13/22, 21/24, 10/25 i 6/26).

Dalje, članom 5. stav (8) Zakona propisano je da je drugo lice, u smislu ovog zakona, lice koje ima prijavljeno prebivalište na području opštine Srebrenica, a ne ispunjava uslove statusa po drugim osnovama navedenim u st. (1), (2), (3), (4), (5), (6) i (7) ovog člana. Dalje, u članu 6. stav (2) Zakona propisano je da sva lica koja imaju prijavljeno prebivalište na području opštine Srebrenica, a ne ispunjavaju uslove za dokazivanje statusa po osnovu člana 5. st. (1), (2), (3), (4), (5), (6) i (7) ovog zakona mogu ostvariti prava na način utvrđen ovim zakonom. Analizirajući ova dva člana Zakona, Radno tijelo je utvrdilo da bi se proširenjem teritorijalnog obuhvata Zakona i na ova lica broj potencijalnih kandidata na javnim pozivima drastično povećao. Pri tome, postoji rizik da bi broj tih lica premašio broj lica koja spadaju u žrtve genocida, njihove porodice, izbjeglice, raseljena lica, povratnike i njihove potomke i zbog kojih je primarno i donesen predmetni Zakon. Dakle, imajući u vidu da se ne radi o licima koje spadaju u žrtve genocida, izbjeglice, raseljena lica, povratnike i njihove potomke, Radno tijelo je utvrdilo da je u vezi sa navedenim pitanjem potrebno provesti dodatne konsultacije i sa šefom Ureda kako bi se zauzeo konačan stav da li je uopće opravdano da se proširuje predmet zakona i na lica iz člana 5. stav (8), odnosno člana 6. stav (2). Nakon dodatnih analiza, te konsultacija sa šefom Ureda Radno tijelo je u Nacrtu zakona brisalo odredbe koje se tiču navedenih lica.

Utvrđeno je da proširenje teritorijalnog obuhvata Zakona na druge opštine koje pripadaju regiji istočne Bosne treba pratiti i adekvatno povećanje najnižeg iznosa sredstava koji se obezbjeđuju u Budžetu za finansiranje mjera iz ovog zakona. Kako Radno tijelo ne bi proizvoljno određivalo navedeni iznos, od šefa Ureda zatražen je prijedlog navedenog iznosa. U prijedlogu izmjena, odnosno dopuna Zakona koji je poslan članovima Radnog tijela od strane šefa Ureda, predloženo je taj iznos umjesto 2.000.000,00 KM bude 4.000.000,00 KM, što je potom i uneseno u član 15. radne verzije Nacrta zakona.

U prijelaznim i završnim odredbama Nacrta Zakona regulisana su pitanja prelaska na nova zakonska rješenja. Utvrđeno je nastavak rada postojećeg Ureda Vlade Kantona Sarajevo za podršku Srebrenici pod novim

nazivom, uz preuzimanje zaposlenika, arhive, imovine te svih prava i obaveza. Vladi i šefu Ureda su utvrđeni obavezujući rokovi (60, odnosno 30 dana) za donošenje nove Uredbe o osnivanju i usklađivanje Pravilnika o unutrašnjoj organizaciji.

U cilju pravne sigurnosti građana, propisano je da će se svi postupci ostvarivanja prava koji su započeti prije stupanja na snagu ovog zakona okončati prema odredbama ranije važećeg propisa.

Utvrđena je dinamika donošenja nove uredbe kojom se definiše status žrtava genocida. Propisana je obaveza Ureda da u roku od 60 dana provede široke konsultacije sa udruženjima i civilnim sektorom, dok je Vladi ostavljen krajnji rok od 180 dana za usvajanje te uredbe. U važećem zakonu se ove odredbe nalaze u članu koji se odnosi na dokazivanje statusa lica, te je Radno tijelo odlučilo da u Nacrtu zakona ove odredbe propiše u prijelazni i završnim odredbama, kako to nalažu nomotehnička pravila.

Propisano je formalno stavljanje van snage važećeg zakona, te je definisano stupanje na snagu novog zakona osmog dana od dana objavljivanja u "Službenim novinama Kantona Sarajevo".

4.3. Saradnja sa šefom Ureda

Zadatak saradnje sa šefom Ureda, Radno tijelo je realizovalo putem upućivanja poziva na sjednice Radnog tijela, te putem pisane komunikacije.

Šef Ureda je na drugoj i četvrtoj sjednici Radnog tijela iznio problematiku vezanu za primjenu važećeg zakona, navodeći pri tome posebno član 5. st. (1) Zakona, koji se tiče definicije žrtve genocida, a s tim u vezi i član 7. Zakona koji propisuje dokazivanje statusa žrtve genocida ili porodice žrtve genocida. Ukazano je da Uredba za izdavanje potvrda o statusu žrtava genocida i/ili porodica žrtava genocida nad Bošnjacima zaštićene zone UN-a Srebrenica nikada nije usvojena. Kao razlog navedeno je, između ostalog, nemogućnost propisivanja načina dokazivanja, s obzirom da ne postoje zvanični registri žrtava genocida. S tim u vezi, predloženo je da Radno tijelo u Nacrtu zakona briše navedene odredbe koje se tiču načina dokazivanja statusa ovih lica, na način kako je to propisano u važećem zakonu.

Imajući u vidu kompleksnost ovog prijedloga, kao i činjenicu da navedeni prijedlog izlazi izvan okvira zadataka koji su postavljeni Radnom tijelu rješenjem Vlade, dogovoreno je da se svi eventualni prijedlozi dostave Radnom tijelu pisanim putem na e-mail, kako bi se Radno tijelo očitovalo o istima.

4.3.1. Osvrt Radnog tijela na primjedbe šefa Ureda

Prijedlozi za izmjene, odnosno dopune Zakona dostavljeni su Radnom tijelu dan prije isteka utvrđenog roka za izvršenje zadatka Radnog tijela.

Radno tijelo je ocijenilo opravdanim sljedeće prijedloge:

1. Brisanje člana 5. stav (8) i člana 6. stav (2) Zakona, koji se odnose na druga lica (lica koja imaju prijavljeno prebivalište na području opštine Srebrenica, a ne ispunjavaju uslove statusa po drugim osnovama navedenim u st. (1), (2), (3), (4), (5), (6) i (7) ovog člana).

2. Brisanje odredbe koja propisuje da sva lica koja imaju prijavljeno prebivalište na području opštine Srebrenica, a ne ispunjavaju uslove za dokazivanje statusa po osnovu člana 5. st. (1), (2), (3), (4), (5), (6) i (7) ovog zakona mogu ostvariti prava na način utvrđen ovim zakonom.

3. Propisivanje godišnjeg iznosa sredstava koji se obezbjeđuje u Budžetu za finansiranje mjera (umjesto 2.000.000,00 KM - 4.000.000,00 KM).

Radno tijelo nije ocijenilo opravdanim sljedeće prijedloge:

1. Brisanje odredbi koje se odnose na donošenje Uredbe za izdavanje potvrda o statusu žrtava genocida i/ili porodica žrtava genocida nad Bošnjacima zaštićene zone UN-a "Srebrenica", te umjesto navedenog propisivanje da žrtve genocida svoj status dokazuju potvrdama nadležnih organa, ovjerenim izjavama, te drugom dokumentacijom koju Ured ocijeni relevantnom. Radno tijelo je ocijenilo da postojeća rješenja u Zakonu ostavljaju mogućnost za efikasnije mehanizme i mogućnosti propisivanja postupka dokazivanja, donošenjem podzakonskog akta, nakon provedenih konsultacija sa relevantnim udruženjima.

2. Propisivanje da preliminarne rezultate javnog poziva utvrđuje šef Ureda i objavljuje na stranici Vlade, a da o žalbama na preliminarnu listu javnog poziva odlučuje posebna komisija za žalbe koju imenuje Vlada. Uredbom o dodjeli transfera neprofitnim organizacijama i pojedincima iz Budžeta Kantona Sarajevo ("Službene novine Kantona Sarajevo", br. 22/21 i 13/22) propisano je, između ostalog, da postupak javnog poziva provodi komisija, da listu prijava dostavlja rukovodiocu davaoca sredstava, te da se prigovor izjavljuje rukovodiocu davaoca sredstava. S obzirom da i odredbe važećeg zakona na ovaj način regulišu navedeni postupak, Radno tijelo je ocijenilo da nije svrsishodno mijenjati odredbe koje se tiču provođenja postupka dodjele sredstava izuzev u dijelu koji se odnosi na imenovanje komisije za provođenje javnog poziva.

5. RADNI MATERIJAL

Pored radnog materijala koji se odnosi na davanje komentara i prijedloga u vezi sa članovima teksta Nacrta zakona na kojem je radilo radno tijelo, iz aktivnosti članova radnog tijela proistekao je i sljedeći radni materijal:

1. Radna verzija Nacrta zakona sa prijedlozima izmjena, odnosno dopuna Zakona, dostavljen od strane šefa Ureda,
2. Tekst Nacrta Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice i drugih opština regije istočna Bosna, pomoći žrtvama i porodicama žrtava genocida nad Bošnjacima zaštićene zone UN "Srebrenica"sa obrazloženjem, pripremljen od strane Radnog tijela.

6. ZAKLJUČAK


U skladu sa obavezama iz Rješenja o imenovanju radnog tijela broj: 02-04-6172-34/26 od 26.02.2026. godine, Radno tijelo pripremlilo je tekst Nacrta Zakona o posebnim programima Kantona Sarajevo za memorijalizaciju genocida u Srebrenici, podršku povratku i razvoju regije istočna Bosna, pomoći žrtvama i porodicama žrtava genocida nad Bošnjacima zaštićene zone UN "Srebrenica".

Prilozi:

1. Rješenje o imenovanju radnog tijela,
2. Poslovnik o radu radnog tijela,
3. Zapisnici sa sjednica radnog tijela,
4. Radni materijal (inicijativa predsjedavajućeg Skupštine Kantona Sarajevo i prijedlozi šefa Ureda Vlade Kantona Sarajevo za podršku Srebrenici dostavljeni u formi izmjena i dopuna Zakona) i
5. Nacrt Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice i drugih opština regije istočna Bosna, pomoći žrtvama i porodicama žrtava genocida nad Bošnjacima zaštićene zone UN "Srebrenica"sa obrazloženjem.

RADNO TIJELO :

1. Dino Mešić – predsjedavajući
/ime i prezime, status/
2. Mediha Selimanović, - član
/ime i prezime, status/
3. Nedima Ramović - član
/ime i prezime, status/



potpis

potpis

potpis

Na osnovu člana 18. stav 1. tačka b) Ustava Kantona Sarajevo ("Službene novine Kantona Sarajevo", br. 1/96, 2/96 - Ispravka, 3/96 - Ispravka, 16/97, 14/00, 4/01, 28/04, 6/13 i 31/17), Skupština Kantona Sarajevo, na _____ Radnoj sjednici održanoj dana _____ 2026. godine donijela je

NACRT

ZAKON

O POSEBNIM PROGRAMIMA KANTONA SARAJEVO ZA MEMORIJALIZACIJU GENOCIDA, PODRŠKU POVRATKU I RAZVOJU SREBRENICE I DRUGIH OPŠTINA REGIJE ISTOČNA BOSNA, POMOĆI ŽRTVAMA I PORODICAMA ŽRTAVA GENOCIDA NAD BOŠNJACIMA ZAŠTIĆENE ZONE UN "SREBRENICA"

POGLAVLJE I – OPĆE ODREDBE

Član 1. (Predmet)

Ovim zakonom se uređuju mjere podrške Vlade Kantona Sarajevo (u daljem tekstu: Vlada) aktivnostima istraživanja i obilježavanja genocida u Srebrenici i mjere podsticaja i podrške žrtvama genocida i porodicama žrtava genocida nad Bošnjacima zaštićene zone UN "Srebrenica", mjere za održivi povratak, razvojne projekte i obnovu u jedinicama lokalne samouprave regije istočna Bosna, licima sa prijavljenim prebivalištem na području opština regije istočna Bosna, izbjeglim, raseljenim licima, povratnicima, te licima koja su se vratila sa područja Kantona Sarajevo na područje jedinica lokalne samouprave regije istočna Bosna od strane institucija Kantona Sarajevo i njihovim potomcima.

Član 2. (Poseban interes i značaj za Kanton Sarajevo)

(1) Posebni programi podrške uređeni ovim zakonom predstavljaju aktivnosti od posebnog interesa za Kanton Sarajevo u svrhu doprinosa i odgovornosti Kantona za provedbu Aneksa VII Općeg okvirnog sporazuma za mir u Bosni i Hercegovini (Sporazum o izbjeglicama i raseljenim licima).

(2) Vlada je dužna posebne programe podrške uređene ovim zakonom učiniti prioritetom prilikom planiranja i provođenja mjera.

Član 3. (Zaštita prava i zabrana ograničenja)

(1) Ovim zakonom se ne može uskratiti ostvarivanje prava izbjeglih, raseljenih lica, povratnika, lica sa prijavljenim prebivalištem u opštini regije istočna Bosna, žrtava i porodica žrtava genocida nad Bošnjacima zaštićene zone UN-a "Srebrenica", a koja ostvaruju po osnovu drugih važećih zakona.

(2) Ovim zakonom se ne može ograničiti podrška aktivnostima vezanim za povratak u opštine regije istočna Bosna, ekonomski razvoj opština regije istočna Bosna, memorijalizaciju genocida, podršku žrtvama i porodicama žrtava genocida nad Bošnjacima zaštićene zone UN-a "Srebrenica", a koju institucije Kantona Sarajevo provode u sklopu svojih drugih redovnih aktivnosti ili po osnovu odluka i javnih poziva koje omogućavaju pristup sredstvima druge namjene.

Član 4. (Definicije)

(1) Genocid u Srebrenici, u smislu ovog zakona, predstavlja zločine počinjene nad Bošnjacima zaštićene zone UN-a "Srebrenica" od jula 1995. godine na području zaštićene zone "Srebrenica",

definisane u pravomoćnim presudama Međunarodnog suda pravde, Međunarodnog krivičnog suda za bivšu Jugoslaviju, Suda Bosne i Hercegovine na širem području regije istočna Bosna, kao i na pravcu progona "Marša smrti".

(2) Jedinicom lokalne samouprave Srebrenica, u smislu ovog zakona, smatrat će se teritorija današnje opštine Srebrenica u bosanskohercegovačkom entitetu Republika Srpska.

(3) Regijom istočna Bosna, u smislu ovog zakona, smatrat će se teritorija današnjih opština Srebrenica, Bratunac, Milići, Vlasenica, Han Pijesak, Sokolac, Zvornik, Osmaci, Višegrad, Rogatica u bosanskohercegovačkom entitetu Republika Srpska.

Član 5. **(Status lica)**

(1) Žrtve genocida, u smislu ovog zakona, su sva lica koja su ubijena ili su nestala u genocidu, kao i lica koja su prognana, transportovana i/ili deportovana sa područja zaštićene zone Ujedinjenih nacija "Srebrenica" od jula 1995. godine do potpisivanja Općeg okvirnog Sporazuma za mir u Bosni i Hercegovini.

(2) Članovima porodica žrtava genocida u Srebrenici, u smislu ovog zakona, smatraju se roditelji/staratelji, dijete, supružnik, brat/sestra, djed/nana, unuk ubijenog, nestalog ili prognanog lica sa područja zaštićene zone UN-a "Srebrenica" od jula 1995. godine do potpisivanja Općeg okvirnog Sporazuma za mir u Bosni i Hercegovini.

(3) Izbjeglica sa područja jedinice lokalne samouprave regije istočna Bosna u smislu ovog zakona je državljanin Bosne i Hercegovine koji se nalazi izvan Bosne i Hercegovine, a koji je zbog sukoba prognan sa svog prebivališta ili je napustio svoje prebivalište u opštini regije istočna Bosna i izbjegao u inostranstvo, nakon 30. aprila 1991. godine bojeći se opravdano, da će biti progonjen zbog svoje rase, vjere, nacionalnosti, pripadnosti nekoj socijalnoj grupi ili svojih političkih mišljenja i koji nije u mogućnosti da se sigurno i dostojanstveno vrati na svoje ranije prebivalište niti je dobrovoljno odlučio da se trajno nastani izvan Bosne i Hercegovine.

(4) Raseljeno lice sa područja jedinice lokalne samouprave regije istočna Bosna je državljanin Bosne i Hercegovine koji ima prijavljeno boravište na području Kantona Sarajevo, a koji je zbog posljedica sukoba prognan sa svog prebivališta ili je napustio svoje prebivalište nakon 30. aprila 1991. godine sa područja jedinice lokalne samouprave koja pripada regiji istočne Bosne, bojeći se opravdano da će biti progonjen zbog svoje rase, vjere, nacionalnosti, pripadnosti nekoj socijalnoj grupi ili svojih političkih mišljenja i koji nije u mogućnosti da se sigurno i dostojanstveno vrati na svoje ranije prebivalište, niti je dobrovoljno odlučio da se trajno nastani na drugom prebivalištu.

(5) Povratnik je izbjeglo lice ili raseljeno lice sa područja jedinice lokalne samouprave regije istočna Bosna koje se vratilo u svoje ranije prebivalište. Povratniku prestaje status protekom roka od šest mjeseci, računajući od dana kada se ponovo nastanio u svoje ranije prebivalište, odnosno trajno nastanio u drugo mjesto prebivališta u Bosni i Hercegovini.

(6) Lice koje se vratilo sa područja Kantona Sarajevo na područje jedinice lokalne samouprave regije istočna Bosna je lice kojem je prestao status povratnika, a koje može dokazati svoje ranije boravište na području Kantona Sarajevo i trenutno prebivalište na području jedinice lokalne samouprave regije istočna Bosna.

(7) Potomak lica iz st. (3), (4), (5) i (6) ovog zakona je dijete ili unuk lica koje ispunjava predviđene uslove.

(8) Lice nije obavezno dokazivati status po više različitih osnova iz ovog člana.

Član 6.
(Rodna neutralnost izraza)

Izrazi koji se koriste u ovom zakonu, a imaju rodno značenje koriste se neutralno i odnose se jednako na muški i ženski rod.

POGLAVLJE II – PRISTUP PROGRAMIMA I DOKAZIVANJE STATUSA

Član 7.
(Ravnopravnost izbjeglih, raseljenih lica, povratnika i lica koja su se vratila sa područja Kantona Sarajevo na područje jedinica lokalne samouprave regije istočna Bosna, njihovih potomaka, žrtava genocida i članova porodica žrtava genocida)

Ovaj zakon garantuje ravnopravnost lica iz člana 5. st. (1), (2), (3), (4), (5), (6) i (7) ovog zakona u smislu pristupa programima i pravima koja ostvaruju kao fizička lica, odnosno pravna lica čiji su suvlasnici/vlasnici, u smislu ovog zakona.

Član 8.
(Dokazivanje statusa žrtve genocida ili člana porodice žrtve genocida)

(1) Lica iz člana 5. st. (1) i (2) ovog zakona svoj status dokazuju potvrdom koju izdaje Ured Vlade Kantona Sarajevo za podršku Srebrenici i drugim opštinama regije istočna Bosna (u daljem tekstu: Ured).

(2) Lica iz člana 5. st. (1) i (2) ovog zakona nisu dužna da dokazuju svoje prijeratno ili trenutno prebivalište na području jedinice lokalne samouprave Srebrenica.

(3) Postupak, uslovi i način izdavanja potvrde iz stava (1) ovog člana detaljnije se propisuju Uredbom za izdavanje potvrda o statusu žrtava genocida i/ili porodica žrtava genocida nad Bošnjacima zaštićene zone UN-a "Srebrenica", koju donosi Vlada.

Član 9.
(Dokazivanje statusa za ostvarivanje prava po drugim osnovama)

(1) Lica iz člana 5. st. (3), (4) i (5) ovog zakona svoj status dokazuju u skladu sa Zakonom o izbjeglicama iz BiH i raseljenim osobama u BiH ("Službeni glasnik BiH", br. 23/99, 21/03 i 33/03).

(2) Lica iz člana 5. stava (6) ovog zakona svoj status dokazuju u skladu sa Zakonom o pravima lica koja se iz Kantona Sarajevo vraćaju u prijeratna mjesta prijeratnog prebivališta ("Službene novine Kantona Sarajevo", br. 18/13 i 26/13-Ispravka).

(3) Lica iz člana 5. stava (7) ovog zakona svoj status dokazuju na osnovu dokaza o direktnom srodstvu (otac/majka, djed/nana) sa licem koje ispunjava uslove iz člana 5. st. (3), (4), (5) ili (6) ovog zakona.

(4) Ukoliko javni poziv obuhvata pravna lica, a gdje se selekcija uslovljava suvlasništvom lica iz člana 5. st. (1), (2), (3), (4), (5), (6) ili (7) ovog zakona, dostavlja se dokaz koji je propisan ovim članom uz dokaz o suvlasništvu/učešću relevantnog fizičkog lica u pravnom licu.

Član 10.
(Pristup programima podrške)

Pristup programima podrške koji su uređeni ovim zakonom se ostvaruje:

- a) prijavom privrednog društva, poljoprivredne zadruge, obrta, udruženja građana, fondacije ili fizičkog lica koje ispunjava uslove javnih poziva posebne namjene koji se tiče realizacije programa utvrđenih ovim zakonom;
- b) dostavljanjem dokaza o ispunjavanju uslova za pristup određenoj podršci po osnovu ličnog statusa.

POGLAVLJE III – VRSTE PROGRAMA PODRŠKE

Član 11.
(Vrste programa podrške)

Ovim zakonom se propisuje uspostava posebnih programa podrške:

- a) program obnove i rekonstrukcije objekata se realizira putem javnog poziva (stambeni/poslovni objekti i drugi objekti u vlasništvu/suvlasništvu fizičkih lica iz člana 5. st. (1) do (7) ovog zakona koju planira i realizira Ured;
- b) program podrške infrastrukturnim projektima na području regije istočna Bosna (elektrifikacija, vodovod i putna infrastruktura) u saradnji sa drugim institucijama na državnom, entitetskom i lokalnom nivou;
- c) program podrške obrazovanju i radnom osposobljavanju lica (stipendiranje i sufinansiranje studija, edukacija i osposobljavanja fizičkih lica iz člana 5. ovog zakona) koju planira i realizira Ured uz konsultacije sa Ministarstvom za odgoj i obrazovanje Kantona Sarajevo i Ministarstvom za nauku, visoko obrazovanje i mlade Kantona Sarajevo;
- d) program podrške istraživačkim projektima o genocidu, povratku i ljudskim pravima (otvoren za fizička lica koja ispunjavaju uslove iz člana 5. ovog zakona) koju planira i realizira Ured;
- e) program besplatne pravne pomoći putem Ureda (dostupan fizičkim licima koja ispunjavaju uslove iz člana 5. ovog zakona i pravnim licima u kojima imaju suvlasništvo od najmanje 25% lica koja ispunjavaju jedan od navedenih uslova, a koja su registrovana na području regije istočna Bosna) koji će obuhvatiti zaštitu prava pred domaćim i međunarodnim sudovima i koji se odnosi i na ostvarivanje prava i savjetovanje pri sastavljanju podnesaka, žalbi, zahtjeva i drugih pravnih akata koje ta lica upućuju jedinicama lokalne samouprave i drugim institucijama uprave i organima Bosne i Hercegovine, entiteta Federacija Bosne i Hercegovine i Republika Srpska;
- f) program podrške investicijama na području jedinica lokalne samouprave regije istočna Bosna (dostupan za privredna društva, obrte, zadruge i gazdinstva sa sjedištem ili registrovanom filijalom na području regije istočna Bosna) koju planira i realizira Ured;
- g) program podrške kulturnim, umjetničkim i sportskim projektima na području jedinica lokalne samouprave regije istočna Bosna putem javnog poziva (dostupan za prijavu fizičkim i pravnim licima sa područja Kantona Sarajevo ili sa područja jedinice lokalne samouprave regije istočna Bosna) koju planira i realizira Ured;

h) program mobilnosti visokokvalifikovane radne snage na području jedinice lokalne samouprave regije istočna Bosna putem javnog poziva (stipendiranje/finansiranje privremenog ili trajnog boravka visokokvalifikovanih lica za rad i doprinos zajednici u opštini regije istočna Bosna dostupan za prijavu fizičkim licima-državljanima Bosne i Hercegovine po ispunjavanju uslova iz člana 5. ovog zakona) koju planira i realizira Ured;

i) godišnji grant Memorijalnom centru Srebrenica-Potočari Spomen obilježje i mezarje za žrtve genocida iz 1995. godine (u daljem tekstu: Memorijalni centar) za istraživačke i razvojne aktivnosti;

j) program podrške udruženjima građana i fondacijama za aktivnosti održivog povratka, zaštite ljudskih prava, jačanja građanskog organizovanja i drugih aktivnosti vezanih za borbu protiv diskriminacije i govora mržnje, na području jedinice lokalne samouprave regije istočna Bosna putem javnog poziva (dostupan za prijavu udruženjima građana i fondacijama sa područja Kantona Sarajevo i sa područja jedinice lokalne samouprave regije istočna Bosna) koji planira i realizira Ured;

k) program učešća u subvencioniranju organizacije javnog prevoza na području jedinica lokalne samouprave koje pripadaju regiji istočne Bosne, prevoza djece i đaka osnovnih i srednjih škola na području regije istočna Bosna, redovnog autobusnog saobraćaja na liniji Srebrenica-Sarajevo-Srebrenica koju planira i realizira Ured na osnovu javnog poziva, koji je otvoren za sva privredna društva koja ispunjavaju uslove za provedbu aktivnosti ove vrste transporta putnika;

l) program podrške roditeljima i djeci kroz posebne aktivnosti podrške po rođenju djeteta, redovne podrške roditeljima sa troje i više djece do punoljetstva, nabavku školske opreme i drugih oblika dodatne asistencije za roditelje koji ispunjavaju uslove iz člana 5. ovog zakona, koju planira i realizira Ured;

m) program podrške ostvarivanju zdravstvene zaštite na području Kantona Sarajevo, što uključuje pristup konsultativno-specijalističkoj zaštiti, dijagnostici, banjskom liječenju, što će refundacijom troškova realizirati Ured po osnovu zahtjeva za lica koja su obuhvaćena članom 5. ovog zakona, a do potrošnje planiranih sredstava na godišnjem nivou za ove namjene.

POGLAVLJE IV – ORGANI ZA PROVOĐENJE MJERA

Član 12.

(Ured Vlade Kantona Sarajevo za podršku Srebrenici i drugim opštinama regije istočna Bosna)

(1) Ured ima sjedište u Sarajevu.

(2) Ured ima najmanje šest zaposlenika, i to: Šefa Ureda, četiri državna službenika i jednog namještenika, a što će se detaljnije urediti pravilnikom o unutrašnjoj organizaciji Ureda.

(3) Prednost pri zaposlenju u Uredu imaju lica koja ispunjavaju uslove iz člana 5. ovog zakona.

(4) O rezultatima rada provođenja Plana i programa mjera propisanih ovim zakonom, šef Ureda izvještava Vladu i Skupštinu Kantona Sarajevo, najkasnije do 31.03. tekuće godine za prethodnu godinu.

Član 13.

(Plan i program)

(1) Plan i program podrške (u daljnjem tekstu: Plan i program) kreira Ured i dostavlja Vladi.

(2) U izradi Plana i programa iz stava (1) ovog člana sudjeluje Ured za borbu protiv korupcije Kantona Sarajevo sa ciljem osiguranja potpune transparentnosti i efektivnosti u provedbi mjera predviđenih ovim zakonom.

(3) Plan i program sadrži metodologiju realizacije mjera, odnosno informaciju na koji način se realizira svaka od mjera (putem pojedinačnih zahtjeva, posebnih projekata i programa, javnih poziva i sl.), uz obavezno navođenja dinamike, rokova, nosilaca izvršenja mjera i način finansiranja). U zavisnosti od vrste mjere, Ured može konsultovati Vladu radi usaglašavanja i pronalaženja najboljeg modusa za realizaciju konkretne mjere.

POGLAVLJE V – POSTUPAK OSTVARIVANJA PRAVA I IZVORI FINANSIRANJA MJERA

Član 14.

(Postupak realizacije programa)

(1) Programi podrške iz člana 11. ovog zakona mogu se realizovati na jedan od sljedećih načina:

a) putem javnih poziva;

b) u saradnji sa opštinskim/općinskim, gradskim, entitetskim ili državnim vlastima na osnovu prethodno potpisanog Memoranduma o saradnji;

c) kontinuirana podrška na osnovu potreba lica iz člana 5. ovog zakona.

(2) Plan i program iz člana 11. ovog zakona obavezno sadrži načine realizacije iz stava (1) ovog člana.

(3) Ukoliko se mjera iz Plana i programa realizira putem javnog poziva iz tačke a) stava (1) ovog člana, isti se provodi putem Komisije za provođenje javnog poziva (u daljem tekstu: Komisija) koju imenuje šef Ureda posebnim rješenjem sa utvrđenim zadacima i rokovima za provođenje procedure. Procedura objavljivanja, trajanje i sadržaj teksta javnog poziva, dodatna obavještenja po javnom pozivu i dostavljanje zahtjeva se provodi u skladu sa pozitivnim zakonskim i podzakonskim propisima.

(4) Preliminarne rezultate javnog poziva utvrđuje Komisija, a šef Ureda ih objavljuje na internet stranici Ureda. O prigovorima na preliminarnu listu javnog poziva odlučuje šef Ureda nakon čega donosi konačnu odluku o rezultatima javnog poziva.

(5) Način rada, odlučivanje, i druga pitanja od značaja za rad Komisije regulišu se poslovnikom o radu Komisije, koji se donosi na konstituirajućoj sjednici Komisije.

Član 15.

(Izvori i način finansiranja)

(1) Izvori sredstava za finansiranje mjera iz ovog zakona su:

a) Budžet;

b) kreditna sredstva;

c) donacije;

d) ostali izvori u skladu sa zakonom.

(2) Godišnji iznos sredstava koji se obezbjeđuje u Budžetu za finansiranje Plana i programa ne može biti manji od 4.000.000,00 KM za finansiranje mjera iz člana 11. ovog zakona.

(3) U iznos predviđen tačkom (2) ovog člana nisu uračunata sredstva za rad Ureda.

(4) Donacije u smislu ovog zakona mogu biti u novcu, robi i uslugama. Sredstva iz donacija se koriste u skladu sa Planom i programom, ako donator ne odredi drugačiju namjenu.

(5) Sredstva za finansiranje ovog zakona imaju poseban analitički kod.

(6) Najmanje 200.000,00 KM sredstava Budžeta uplaćuje se Memorijalnom centru Srebrenica-Potočari Spomen obilježje i mezarje za žrtve genocida iz 1995. godine godišnje kao grant u svrhu osiguranja kontinuiteta rada.

(7) Sredstvima za finansiranje mjera iz ovog zakona raspolaže Vlada prema utvrđenom Planu i programu.

POGLAVLJE VI - NADZOR

Član 16.

(Nadzor nad primjenom zakona)

Nadzor nad primjenom ovog zakona u smislu praćenja realizacije programa i projekata iz Plana i programa vrši Ministarstvo za rad, socijalnu politiku, raseljena lica i izbjeglice Kantona Sarajevo.

Član 17.

(Inspeksijski nadzor)

Inspeksijski nadzor nad primjenom ovog zakona vrši Kantonalna uprava za inspeksijske poslove, Upravni inspektorat Ministarstva pravde i uprave Kantona Sarajevo i Budžetski inspektorat Ministarstva finansija Kantona Sarajevo, u skladu sa svojim nadležnostima.

POGLAVLJE VII – PRESTANAK PRAVA I KAZNENE ODREDBE

Član 18.

(Promjena statusa)

Lica koja su ostvarila pravo po ovom zakonu, obavezna su u roku od 15 dana obavijestiti Ured o svakoj promjeni koja bi mogla uticati na nastavak ostvarivanja stečenih prava ili zbog koje to lice kao korisnik sredstava ili usluga gubi pravo u smislu ovog zakona.

Član 19.

(Kazne za prekršaje)

(1) Novčanom kaznom u iznosu od 500,00 KM do 5.000,00 KM kaznit će se za prekršaj odgovorno lice u nadležnom organu uprave i/ili službenik organa uprave ako daje netačne podatke ili lažne izjave ili ako preusmjeri sredstva za finansiranje mjera iz ovog zakona u nenamjenske svrhe.

(2) Novčanom kaznom u iznosu od 500,00 KM do 5.000,00 KM kaznit će se za prekršaj lice koje dostavi netačne ili neistinite podatke ili poduzme druge radnje s ciljem dovođenja u zabludu nadležnog organa radi ostvarivanja nepripadajuće koristi po odredbama ovog zakona.

(3) Sva lica koja ne dostave zatražene izvještaje po osnovu ostvarenih prava do rokova propisanih uslovima poziva za realizaciju različitih programa u okviru ovog zakona ne mogu ostvariti prava po osnovu ovog zakona od godinu dana do trajne zabrane apliciranja za sredstva prema Uredu.

POGLAVLJE VIII – PRIJELAZNE I ZAVRŠNE ODREDBE

Član 20. (Pravni kontinuitet Ureda)

(1) Ured Vlade Kantona Sarajevo za podršku Srebrenici, osnovan Uredbom o osnivanju Ureda Vlade Kantona Sarajevo za podršku Srebrenici ("Službene novine Kantona Sarajevo", broj 29/22), nastavlja sa radom u skladu sa ovim zakonom i pod novim nazivom, te preuzima državne službenike, arhivu, dokumentaciju i sredstva za rad, odnosno sva prava i obaveze koje je isti imao na dan stupanja na snagu ovog zakona.

(2) Vlada će u roku od 60 dana od dana stupanja na snagu ovog zakona, donijeti Uredbu o osnivanju Ureda Vlade Kantona Sarajevo za podršku Srebrenici i drugim opštinama regije istočna Bosna.

(3) Šef Ureda će, u roku od 30 dana od dana stupanja na snagu uredbe iz stava (2) ovog člana, donijeti Pravilnik o unutrašnjoj organizaciji Ureda.

Član 21. (Donošenje podzakonskog akta)

(1) Ured će, najkasnije u roku od 60 dana od dana stupanja na snagu ovog zakona, provesti konsultacije sa udruženjima porodica žrtava genocida, memorijalima, akademskom zajednicom i organizacijama civilnog društva u svrhu izrade prijedloga uredbe iz člana 8. stav (3) ovog zakona.

(2) Ured je dužan prijedlog uredbe iz stava (1) ovog člana dostaviti Vladi na razmatranje i usvajanje najkasnije u roku od 150 dana od dana stupanja na snagu ovog zakona.

(3) Vlada će donijeti uredbu iz stava (1) ovog člana najkasnije u roku od 180 dana od dana stupanja na snagu ovog zakona.

Član 22. (Započeti postupci)

Postupci koji su započeti prije stupanja na snagu ovog zakona, a koji do dana njegovog stupanja na snagu nisu okončani, okončat će se po odredbama zakona koji je bio na snazi u vrijeme pokretanja postupka.

Član 23. (Prestanak važenja drugih propisa)

Danom stupanja na snagu ovog zakona prestaje da važi Zakon o posebnim programima Kantona Sarajevo za memorijalizaciju genocida, podršku povratku i razvoju Srebrenice, pomoći žrtvama i porodicama žrtava genocida nad Bošnjacima zaštićene zone UN "Srebrenica" ("Službene novine Kantona Sarajevo", broj 18/22).

Član 24. (Stupanje na snagu)

Ovaj Zakon stupa na snagu osmog dana od dana objavljivanja u "Službenim novinama Kantona Sarajevo".

Broj: _____
Sarajevo, _____

**PREDSJEDAVAJUĆI
SKUPŠTINE KANTONA SARAJEVO**

Elvedin Okerić

